

Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi
(Lc 3.23-38)*

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnē. Davidpijinē pijinia Abrahampijinē pemomoxiyajuvēnē. ² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnē pevēnē Judá. Judápijinē pematapijinēbeje, peyuyapijivi ata, xaina. ³ Judápijinē juya pexēnatobeje xaina. Itsanē pevēnē Fares. Itsanē Zara. Bajara-ponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram. ⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón. ⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isaí. ⁶ Isaípijinē juya pexēnato xaina. Pevēnē

David. Bajaraponēmi nacuaeavetsinēmi. Davidpijinē yacajērēta Uríaspijinē pijavami. Nexata bajarapajivibeje juya pexēnato xainabeje. Pevēnē Salomón. ⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa. ⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías. ⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acaz. Acazpijinē juya pexēnato xaina. Pevēnē Ezequías. ¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías. ¹¹ Josíaspijinē juya pexi xaina. Pexiyajuvēnēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecēbiaya caponatsi Babilonia nacuayabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel. ¹³ Zorobabelpijinē juya pexēnato xaina. Pevēnē Abiud. Abiudpijinē juya pexēnato xaina. Pevēnē Eliaquim. Eliaquimpijinē juya pexēnato xaina. Pevēnē Azor. ¹⁴ Azorpijinē juya pexēnato xaina. Pevēnē Sadoc. Sadocpijinē juya pexēnato xaina. Pevēnē Aquim. Aquimpijinē juya pexēnato xaina. Pevēnē Eliud. ¹⁵ Eliudpijinē juya pexēnato xaina. Pevēnē Eleazar. Eleazarpijinē juya

pexênato xaina. Pevênë Matán. Matánpijinë juya pexênato xaina. Pevênë Jacob. ¹⁶ Jacobpjinë juya pexênato xaina. Pevênë José. Bajaraponëmi María pamona. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

¹⁷ Nexata Abrahampijinëmita petaxuxu-ubicujinae jivi penaexanaponaejava, trecenëta naexana Davidpjinë. Bjaraxuacujinae icatsia Davidpjinëmita petaxuxuubicujinae jivi penaexanaponaejava, trecenëta icatsia naexana Jeconíaspjinë. Pamatacabi Israel nacuapijivi cobecëbiaya caponatsi Babilonia nacuyabelia, naexana Jeconíaspjinë. Bjaraxuacujinae icatsia Jeconíaspjinëmita petaxuxuubicujinae jivi penaexanaponaejava, trecenë pijavata naexana Jesucristo jane baja, ponë Dioso athëbëvetsica itoroba jivi pecapanepaenexa.

*Pacuenia Jesús naexana yabara pelivaisi
(Lc 2.1-7)*

¹⁸ Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bjaraxuacujinae penapitsivajënaeyabeje, María nayapëtane penacoxitsijava Espíritu Santo pejamatabëcueneta. ¹⁹ José, María jane baja pamonanexa, bitso penajamatabëcuenereviabinë. Bjaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponaponae:

—Itsanëjavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabëjai picani bëpënëa tsaponaponae José.

²⁰ Pamatacabi abaxë José bajarapacuenia namatabëxainaponapona, majitsinaebota José tsitanaitajëtatsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinë pemomomë. Pëtsa cjunavame nepitsijava María nijavanexa. Tshipaji raja panacueto María yacotaponapona, Espíritu Santo saya pejamatabëcueneta nacoxita.

²¹ Bajarapova exanaena penacuetonëyo. Vënërubianame bajarapanacuetonëyo Jesús. Tshipaji raja bajaraponë capanepaena daxita pijajivi pibisiacuene pexanaeneconimivecua.

²² Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniaje:

²³ Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume,

jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jumecovënëta pacuenia itorobatsi ángel. Nex-

ata baja José pijaboyaberena María barëpata pija-
vanexa. ²⁵ Itsiata abaxë José apo imoxoyobi pijava
penamataxainaenacuetonëyo pevecuanaexanae-
vajënaeyatsi. Bajarapanacuetonëyo jane baja José
vënëruba JESUS.

2

*Pacuenia tulupu perubenaejava pecanaëcobivi
najetarubena petaenexa Jesúsñëyo yabara pelivaisi*

¹ Jesús naexana Belén tomarata, Judea
nacuata peecaetomarata. Bajarapamatacabi
nacuaevevetsinë Herodes Judeanacua eveta.
Nexata Jesús penaexanaecujinae, pebijivi,
tulupu perubenaejava pecanaëcobivi,
pata tajënacuajavavetsina. Pata Jerusalén
tomarajavabetsina. ² Tulupu perubenaejava
pecanaëcobivi yanijobapona jivijavabelia:

—¿Detsa jota barëcatsi panacuetonëyo naexana
judíovi pepo pevetsinënexa? Payapëtaniji
bajaraponëyo penaexanaejava. Tsipaji baja
cajena pataniji bajaraponëyo penaexanaejavata
penaitajëtsituluputo. Bajarapatuluputo pataniji
patajanacuatareca. Bajaraxuata paponainajë
mabetsinaje patataenexa bajaraponëyo, bajara-
ponëyo pitabarata yaiyataeya patamatabacabëta
patatonubenaenexa, jai tsaponae jivijavabelia
tulupu perubenaejava pecanaëcobivi.

³ Nexata Herodes, Judeanacua pevetsinë,
vënëlivaisitane tulupu perubenaejava
pecanaëcobivi bajarapacuenia pejumaitapon-
aejava jivijavabelia Jesúsñëyo yabara. Nexata
Herodes bitso najamatabëxaina. Daxita

Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane, jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

⁷ Bajaraxuacujinae Herodes muetsia junata tajënacuavetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejala pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejala pecanaëcobivijavabelia.

⁹ Nexata jane baja tulupu perubenaejala pecanaëcobivi ponalia Belén tomarabelia. Nexata bajarapamonae namutualia penajetarubenaesjavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsñëyo pena barëecatsi pematatsënëatsia, bajarapatuluputo rucojopa.

¹⁰ Tulupu perubenaejala pecanaëcobivi itsa tane bajarapatuluputo, bitso barëya. ¹¹ Nexata bajarapamonae boyalia itsa joneya, tane Jesúsñëyo, pena yajava. Nexata tulupu perubenaejala pecanaëcobivi yaiyataeya pematatabacabëta tonubenajunua Jesúsñëyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsñëyo rajuta orojavanë. Rajutanua petuxujuvijavabeje. Itsajava inciensovënëjava. Itsajava mirravënëjava. ¹² Bajaraxuacujinae

tulupu perubenaejala pecanaëcobivi meravi majitsinaebota Dioso itavetatsi penaviabiyaniva nacuaevetsinë Herodesjavabelia. Nexata tulupu perubenaejala pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnyo Egipto nacuyabelia yabara pelivaisi

¹³ Tulupu perubenaejala pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamajitsinae-meravi baja José barëpona Jesúsnyo, pena yajava. Barënajetabajirava Egipto nacuyabelia.

¹⁵ Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaisi Jesús yabara mapacueniaje: “Taxënato icatsia junatsiarenajë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaevecsine Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaevecsine Herodes picani jumaitsi tulupu perubenaejala pecanaëcobivijavabelia: “Itsa pacaxitajarabianame bajarapanacuetoneyo, panevajunucaponaeremena,” jai picani Herodes Jesúsneyo yabara. Itsiata tulupu perubenaejala pecanaëcobivi caxitajarabi ata Jesúsneyo, apo vajunucapona Herodesjavabelia. Nexata Herodes itsa yapëtane tulupu perubenaejala pecanaëcobivi apo pevajunucaponaejavatsirena, caxitajarabi ata Jesúsneyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonejava ata. Daxita papebinacuetoxi abaxë apo xinae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsneyo picani peyajavabeyaxuabinexatsi. Tsipaji tulupu perubenaejala pecanaëcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

18 Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi, jai bajayata tajëvelia profeta Jeramíaspijinë peyaquinaelivaisita pecoxibeponaejavanexatsi yabara bajarapatomarata.

19 Nacuaevetsinë baja Herodes peputatëpae, Dioso icatsia pijaángel itoroba Joséjavabelia. Nexata ángel meravi majitsinaebota José tsitanaitajëtatsi Egipto nacuata. 20 Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuyabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

21 Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuyabelia. 22 Nacuaevetsinëmi Herodespijinë pexënato pevënë Arquelao. Nexata Arquelao eveta Judeanacua paxa pevënamuto. Nexata José itsa vënëlivaisitane nacuaevetsinëmi Herodespijinë pexënato pevetsijava Judeanacua, José cujunava Jesúsñëyo pebarëponaejava Judea nacuyabelia. Majitsinaebota José Dioso itavetatsi Jesúsñëyo pebarëponaeyaniva Judea nacuyabelia. Nexata José barëpona Jesúsñëyo Galilea nacuyabelia. 23 José itsa barëpata Jesúsñëyo Galilea nacuyabelia, Nazaret tomarata

barëpatajopa pebarëecaenexa Nazaret tomarata. Bajarapacuenia José Nazaret tomarata ita barëeca Jesúsnyo, copiapata jane baja pacuenia baja cajena bajayata Diosojumepaebivimi profetavi tajëvelia jumaitsi. Diosojumepaebivimi profetavi bajayata baja cajena tajëvelia jumaitsi Jesús yabara mapacueniaje: “Ponë Dioso itorobijitsiatsica jivi pecapanepaenexa, bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús ita baja xaina bejamatabëcuene treinta pavaibeje, Juan jivibautisabinë najetaruca Judea nacuatusatojava. ² Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënëyorore Diosojavabelia, jai tsanajetaruca Juan jivijavabelia.

³ Bajarapacuenia Juan Dioso pitorobilivaisi jivi ita tsipaebanajetaruca, copiapata jane baja pacuenia Diosojumepaebinëmi profeta, Isaiaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipaebanajetarucajavanexa yabara, yaquina.

Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucæejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeyarena,” jai tsane tanejumelivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipaebanajetarucæejavanexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopijivi ata. ⁶ Nexata bajarapamonae pibisiacuene pexanaejavami, roviaia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaëtozaneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacapanepaena, jamatabëjai.

Nexata Juan itsa tane ayaibitsaëtozaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpa itsa tane isoto petajuenajetaru-caejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa.

⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia.

⁹ Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso.

¹⁰ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata

bajaraponaenēmi tajuatsi. Bajara pijinia pacuenia paxamē ata Dioso pacaxuabiana infiernojavabelia papecatajuenexa, Dioso apo panejumecovēnētsivi. ¹¹ Xanē raja saya jivi bautisabaponajē merata. Tsipaji baja bajarapamonae copaba pibisiacue pexanabiabijava. Najamatabēcuenepēnyorotanea Diosojavabelia. Itsiata baitsi jane ponē tacovēverena najetarucaena, tabautisabivi Espiritu Santo tsijamatabējoneyaexanaenatsi, pitarunutsicotia yajava. Xanē raja saya beveliajamatabēcuenenēnē bajaraponēvecua. Nexata bajaraponē vecuaauranē pijazapato ata tatocaponaenexa bepijajivitonēcuenianē. ¹² Arrozxainanē baja itsa vereta arroz pesiricaejava, jēaba arroz pejëabijavata pepitsinexa ēpexu. Nexata pijaarroz pejëabijavata, saicaya tsatapona ēpexu pesivecua. Nexata ēpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamē ata Dioso pejumecovēnētsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaē pijinia Dioso pejumecovēnētsivi, Dioso capanepaenatsi pijanacuayabetsia. Pamonaē pijinia Dioso apo jumecovēnētsi, Dioso naneconitsiaexanaenatsi daxitamatacabijavabelianexa apo peverevereceaesotojavabelia, jai Juan daxita bajarapamonaejavabelia.

*Pacuenia Juan bautisaba Jesús yabara pelivaisi
(Mr 1.9-11; Lc 3.21-22)*

¹³ Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴ Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi.

¹⁷ Nexata Juan jumetane athëbëvetsica Dioso pejumaitisijava: “Mara ponë taxë nato tasivanëje. Siva-jamatabëcuenebarëyanë bitso,” pejaijava.

4

Pacuenia Jesús jamatabëcueneëjëbatsi dovathi yabara pelivaisi

(Mr 1.12-13; Lc 4.1-13)

¹ Jesús pebautisabicujinaetsi, Espíritu Santo ponaeyaexanatsi petusato nacujavaverena. Bajarabelia ponaeyaexanatsi pejamatabëcueneëjëbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapaibotonëje penaexanaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereceajava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. ⁶ Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremea irabereca. Bajarapacuenia jirevaremea irabereca tsipaji xamë nitsacueneyaniva pecaevecsina Dioso pejumelivaisibaxutota jumaitsi mapacueniaje:

Dioso itorobianica pijaángelevi pecaevecsina. Nexata ángelevi pecobeta cayotsiana pecataxutsaquitsiyaniva ibotonëjavabelia, jai Dioso pejumelivaisibaxutota xamë pecaevecsina ángelevi, jai dovathi Jesúsjavabelia.

⁷ Jesús nexata icatsia jumaitsi dovathijavabelia:
 —Jume raja. Dioso raja pijinia pejume-
 livaisibaxutota jumaitsi mapacueniaje:
 “Itsajivi ata jamatabëcuenenavëxaniabiaya
 pijacuata apo bejamatabëjumaitsi: ‘Xanë Dioso
 jamatabëcuenejëtsianajë. Nexata exanaenajë
 pacuene bitso netsiayai tatëpaenexa. Itsiata Dioso
 neyavenonaena tavecuapanepaenexa bajaraxua.
 Nexata bajarapacuenia yapëtaenajë Dioso
 taneyavenonaejava,’ apo bejamatabëjai,” jai Dioso
 pejumelivaisibaxutota, jai Jesús dovathijavabelia.

⁸ Jesús icatsia barëliatsi dovathi pinijitsutoxane-
 tojavabelia. Barëjunayatsi bajarapatsutojumabet-
 sia. Nexata bajarapatsutojumavetsica dovathi
 Jesús tsitajëtatsi daxitanacuanë. Daxita bajara-
 panacuanëta daxitacuene pexainaejava yajavat-
 sitajëtatsi. ⁹ Nexata icatsia dovathi jumaitsi
 Jesúsjavabelia:

—Ayaijamatabëcuenenënë netaeya taitabarata
 nematabacabëta itsa netonucajunuame, nexata
 daxita mapanacuanëtaje, daxitacuene xua xaina,
 cayajavarajutsianatsi, jai dovathi Jesúsjavabelia.

¹⁰ Nexata Jesús jumaitsi dovathijavabelia:

—Dovathi, nevecuanatixire. Dioso raja
 pejumelivaisibaxutota jumaitsi mapacueniaje:
 “Daxitajivi vajëcae pematabacabëta caenë pepo
 petuxanenë Diosojavabelia. Tonacuenebinua
 bajaraëponënexa,” jai raja Dioso pejumelivaisibax-
 utota, jai Jesús dovathijavabelia.

¹¹ Nexata baja dovathi Jesús vecuaponatsi. Ba-
 jaraxuacujinae ángelevi patsica Jesús peyavenon-
 aenexatsi.

*Pacuenia Jesús Galilea nacuata taxuxuaba
Dioso pitorobilivaisi jivi petsipaebijava yabara
pelivaisi*

(Mr 1.14-15; Lc 4.14-15)

¹² Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuyabelia. ¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabulónvënë nacuabeje Neftalivënë nacuabejejavata. Capernaumtomara eca pucaxanetoitapata. ¹⁴ Bajarapacuenia Jesús

itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

¹⁵⁻¹⁶ Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtoxanetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi

itsa tsipaebianatsi Diosojavabelia
 pecapanepaelivaisinexatsi,
 jai tajëvelia Isafáspijinë peyaquinaelivaisita Dioso
 pitorobilivaisi Jesús petsipaebijavanexa yabara
 bajarapanacuanëpijivijavabelia.

¹⁷ Nexata Capernaum tomarata Jesús taxuxu-
 aba Dioso pitorobilivaisi jivi petsipaebijava.
 Dioso pitorobilivaisi Jesús itsa tsipaeba,
 jivijavabelia jumai tsaponae mapacueniaje:

—Dioso rabaja papecaevetsimatacabinexa,
 imoxoyo baja pevajënae pecopiapatsinexa.
 Nexata baja pacopabare pibisiacuene pane-
 exanabiabijava. Panajamatabëcuenepënëyorore
 Diosojavabelia, jai tsaponae Jesús jivijavabelia.

*Pacuenia Jesús junata cuatro ponëbeje dujuai
 peyamatajucabiabivi yabara pelivaisi
 (Mr 1.16-20; Lc 5.1-11)*

¹⁸ Jesús najetaruca Galilea pucaxaneto
 itapaya. Nexata Galilea pucaitapata Jesús
 taenuta anijanëbeje nacaebananëbeje, Simónbeje
 Andrésbeje. Simón itsavënë Pedro. Bajaraponëbeje
 daxitamatacabi canacujitsia dujuai yamata-
 jucabiababeje. Dujuai peyamatajucabiabija-
 vatabeje, yamatajucaponaponabeje. ¹⁹ Nexata
 Jesús jumaitsi Simónbeje Andrésbejejavabelia:

—Naxanitsia. Panepënaponarebeje. Nexata
 pacacujarubianatsibeje jivi panejucaenexabeje.
 Pacuenia dujuai payamatajucabiabamebeje,
 bajarapacuenia jivi pajucaename Dioso
 pijajivínexa, jai Jesús.

²⁰ Nexata Simónbeje Andrésbeje dujuai peyamatajucabiabijavamibeje, bajarajota puenetabutaabeje. Nexata baja naponabeje Jesús pepëta.

²¹ Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje.

²² Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

*Pacuenia Jesús livaisi tsipaeba jivi
ayaibitsaëtoxanetojavabelia yabara pelivaisi
(Lc 6.17-19)*

²³ Jesús jane baja najetaruca daxita Galilea nacuajava. Dioso pitorobilivaisi tsipaebapona judíovi penacaetuatabiabibonëjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. ²⁴ Nexata daxita Siria nacuajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pënaponatsi jivi ayaibitsaëtoxaneto Galilea nacuapijivi, Decápolis nacuapijivi ata,

6 'Jamatabëcuenebarëya tsavanapae tsane pamonae mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabi-anatsi pexanaenexa bajarapacuene.

7 'Jamatabëcuenebarëya tsavanapae tsane pamonae mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

8 'Jamatabëcuenebarëya tsavanapae tsane pamonae mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

9 'Jamatabëcuenebarëya tsavanapae tsane pamonae mapanacuata penaitoyavimi ata, nabaramatabëcuene xanepanaeyaexanapona. Bajarapamonae yabara: "Taxi," jai tsane Dioso.

10 'Jamatabëcuenebarëya tsavanapae tsane pamonae mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

11 'Patajajivixaemë, itsamonae pibisiacuenia itsa pacabaracuaicuaijai, itsiata pajamatabëcuenebarëyamë tsavanapae tsane. Bajarapamonae pacabejiobiaexanae ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane. 12 Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso

pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuatata pejamatabëcuene beyajo, bepecotianua, yabara pelivaisi

(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Yajobeno xanepana vajaexabinexa pevi piabejyaniva. Paxamë rabaja pijinia bepajomë tsavanapae mapanacuapijivijavabeliaje, mapanacuapijivi bitso piabejyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ 'Pacuenia piatayotsicotia itayota piataquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame piaja-matabëcueneitaquirivimi. Bajarapacuenia

pajamatabëcueneitayotsianame itsa patsita-jinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuenepaneexanavanapaejava. Nexata bajarapamonae itsa pacacuenetaena pexaniacuenepaneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba

bajarapalivaisitabeje. ¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitane toyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapaya-juvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

*Pacuenia Jesús muxujioba pijajivi peco-
patsinexa penabaraanaepanabiabijava yabara
pelivaisi*

(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. ²² Itsiata baitsi jane xanë pacatsipaebatsi mapacueniaje. Pajivi baranaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi inferno isotojavabelia.

²³ Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje. ²⁴ Altarvënëjava pitabarata abaxë papuenerere ofrenda

panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

²⁵ 'Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuaijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponanexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota.

²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojiobinë itsava pejajitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi

jumaitsi. Dioso Moiséspijinëta penajumecopat-silivaisi jumaitsi mapacueniaje: “Pëtsa jaitame itsava nijavavecua,” jai. ²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxu-abinexa bajarapaitaxuto, padaxitaperabëtojivimë Dioso papecaxuabiyanima infiernojavabelia.

³⁰ Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabiyanima infiernojavabelia, jai Jesús pijajivijavabelia.

Pacuenia Jesús pijajivi muxujioba penacojiobinë pijava pexuabiyanima yabara pelivaisi

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae

xuabi pijava,” jai bajayata Dioso Moiséspijinëta penajumecopatsilivaisi. ³² Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixae, nacojibijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniva, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacueni najumecapanepaeya panavajunupaebame xua paexanaejitsiamë, itsamonae papecajumexaniataenexa itsa pajumaitsimë: ‘Xaniajanë raja. Cajumaitsi mapacueniaje Dioso pitabarata,’ itsa pajamë, pëtsa eputua panajamatabëcopatame bajaraxua paexanaenejevamë,” jai bajayata

Moiséspijinē panijasalinaivimijavabelia. ³⁴ Itsiata baitsi jane xanē mapacuenia pacaitorobatsije. Najumecapanepaeya itsa panavajunupaebame xua paexanaejitsiamē, roviaia panavajunupaebare. Pētsa pematatsēnēa itsajumeyo ata yajava pajumaitsimē jivi papecajumexaniataenexa. Papecajumexaniataenexa itsajivi pētsa pajumaitsimē mapacueniaje: “Xaniajanē raja. Cajumaitsitsi mapacueniaje Dioso pitabarata,” pajamē pētsa. Pētsa pajumaitsimēnua: “Xaniajanē raja. Cajumaitsitsi mapacueniaje athēbēnacua pevēnēta,” pajamē pētsa. Tsipaji bajarajotatsia Dioso eca pijatronovēnējavata, itsajota ecabiaba pitorobinexa pijajivi. ³⁵ Pētsa pajumaitsimēnua: “Xaniajanē raja. Cajumaitsitsi mapacueniaje mapairaje pevēnēta,” pajamē pētsa. Tsipaji raja Dioso pijaira. Pētsa bajarapacuenia pajumaitsimē Jerusaléntomara ata pevēnēta. Tsipaji Jerusaléntomara Dioso pepo nacuaevetsinē pijatomara. ³⁶ Pētsa pajumaitsimēnua: “Xaniajanē cajena. Itsa apo xaniajanē tsane, nexata nacaevetsianajē tanematathinaxuabinexamē tatēpaenexa,” pajamē pētsa. Tsipaji panematabocoto ata Dioso eveta. Nexata paxamē apo pacacaējēpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. ³⁷ Itsa pepacuenē paexanaejitsiamē, “Jājā, exanaenajē,” pajamēre roviaia. Itsa apo pajamatabēexanaemē, “Jume, apo exanaenē tsane,” pajamēre roviaia. Pematatsēnēa pētsa pajumaitsimē itsajumeyo ata jivi papecajumexaniataenexa. Tsipaji bajarapajume dovathi pejamatabēcueneta

pajumaitsimë tsipae, jai Jesús pijajivijavabelia.

*Pacuenia Jesús pijajivi muxujioba
pecuenecanaviatsiyaniva itsajivi itsacueniabi
atatsi yabara pelivaisi*

(Lc 6.29-30)

³⁸ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopat-silivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi.

³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabara-pacabiauxuaba anaeya, nexata icatsia itsanenia ata papecaitarapacataxuabinexa, panaitabara-caevere. ⁴⁰ Itsajivi itsa pacaneconitsijitsia

jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia pane-naxatatsijava ata papecavecuapitsinexa.

⁴¹ Vajabitsaë itsa pacacaponaeaxana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. ⁴² Bitso bepejiobijivi itsa pacavajëta itsacuenejavayo, parajure. Itsa

pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopat-silivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitoyavi ata. Pamonaë ata pibisiacuenia pacabaracuaicuaijai, bajarapamonaë paxamë xaniavaetsia pabaracuaicuaijamëre. Pamonaë ata pacaitoya, bajarapamonaë pexaniacuene patoexanare. Pamonaë ata pibisiacuenia pacabijatane, pibisiacuene pacaexanaë ata, patovajëre Diosojavabelia peyavenonaenexatsi.

⁴⁵ Bajarapacuenia nexata paneaxa, athëbëtatsia peecaenë, papeximëcuenia patsitajinavanapae-name. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso

pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. ⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—¡Xania baja tsane! Pëtsa pexaniacuene paexaname saya jivi papecacuenetaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia.

² Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabiabibonëjava, callejava ata. Bajarapamonae navajunupaebabiaba

bepejiobivi peyavenonaejava, bepexani-
 ajamatabëcuenevi saya petaenexatsi jivi.
 Xaniajanë pacuenia pacatsipaebijitsiatsi.
 Pamonaë bajarapacuenia navajunupaebabiaba,
 bajarapacuenia penavajunupaebabiabixae,
 Diosojavabelia apo xinae tsane athëbëtatsia
 perajutsijavanexatsi. ³ Itsa payavenoname
 bepejiobivi, pëtsa panavajunupaebame itsajivi-
 javabelia ata, bitso papecayapëtaejivijavabelia
 ata. ⁴ Muetsia payavenonare bepejiobivi.
 Nexata paneaxa, papecataenë muetsia
 paneexanaejava ata, pacarajutsiana bepejiobivi
 muetsia paneyavenonaematamo, jai Jesús
 pijajivijavabelia.

*Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi
 (Lc 11.2-4)*

⁵ Icatsia Jesús jumaitsi petsutoyenepanajavata
 pijajivi ayaibitsaëttoxanetojavabelia:

—Itsa pavajëcame Diosojavabelia, pëtsa
 pavajëcame pacuenia itsamonae vajëcabiaba.
 Bajarapamonae saya jema vajëcabiaba
 Diosojavabelia jivi petaenexatsi Dioso bepejume-
 covënëtsivi. Bajarapamonae jitsipabiaba nucaeya
 pevajëtsinexa Diosojavabelia daxitajivi pitabarata
 judíovi penacaetuatabiabibonëjava, calle
 penaepacaxitajarabijava ata. Bajarapacuenia
 vajëcabiaba Diosojavabelia Dioso bepejume-
 covënëtsivi petaenexatsi jivi. Xaniajanë pacuenia
 pacatsipaebijitsiatsi. Pamonaë bajarapacuenia
 exanabiaba, bajarapacuenia pexanaexae,
 Diosojavabelia apo xinae tsane athëbëtatsia

perajutsijavanexatsi. ⁶ Nexata paxamë Diosojavabelia itsa pavajëcame, pacaenëmë canacujitsia, pajonemeya panijaboyalia. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

⁷ 'Itsa pavajëcame Diosojavabelia, pëtsa napëna pavajëcame saya piapianexa panevajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiaya jamatabëjumai tsabiabi: "Itsa bitso apia vajavajëcaejava Diosojavabelia, nexata matapania Dioso nacajumetaena vajavajëcaejava," jamatabëjai tsabiabi Dioso apo peyapëtaevi. ⁸ Pëtsa bajarapacuenia paxamë pajamatabëcueneitsimë. Panevajëcaevajënaeya ata raja paneaxa, Dioso, yapëtane xua panamatavenoname. ⁹ Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi. ¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxae-javanexa pacuenia panamatavenonajë.

12 Panevecuaajibiaexanare pibisiacuene pataexanaeneconimi. Pacuenia paxanë pajamatabëcuenecaevajë, pabarajamatabëcuenexanepananua, itsamonae paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuene xanepanarena.

13 Panevecuatsare dovathi patanejamatabëcuenejëbiyaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia,

jai Jesús pijajivijavabelia.

14 Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua.

15 Paxamë itsa apo pajamatabëcuenecaevimë tsane

itsamonaē pibisiacuene papecaexanaejava, itsa apo pabarajamatabēcuenexanepanaemēnua tsane, nexata paneaxa ata apo jamatabēcuenecaēvi tsane. Apo pacabarajamatabēcuenexanepanaenua tsane, pītabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajētaḡona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibitsaētoḡanetojavabelia:

—Itsa apo paxaemē panexaejava pamatacabibeje pavajēcame Diosojavabelia, pētsa pajinavanapame panaitabaraquiatsinejevamē, panamatatiatsinejevamēnua. Itsamonaē Diosojavabelia itsa vajēcabiaba pexaejava xaenejeva, pamatacabibeje vajēcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajēcabiaba Diosojavabelia tsipaji saya bajarapamonaē jitsipa petaevitsi pesivajamatabējumaitsinexatsi: “Mapamonaēje Dioso bitso pejumecovēnēsivi. Diosojavabelia bitso pevajēcaēvi pexaejava xaenejeva. Nayapētane Diosojavabelia bitso pevajēcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabējainexatsi petaevitsi. Xaniajanē pacuenia pacatsipaebijitsiatsi. Bajarapamonaē pexaejava xaenejeva vajēcabiabi ata Diosojavabelia, itsiata

bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba. ¹⁷ Paxamë ita apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenuua xaniavaetsia. ¹⁸ Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayaijava pexainaenexa athëbëtsia yabara pelivaisi (Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa pacaetuataponame ayaijava panexainaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi. ²⁰ Dioso jane xaniavaetsia patonacuenebavanapare. Nexata Diosojavabelia ayaijava pexaniacuene paxainaname athëbëtsia. Nexata bajarajotatsia apo pacatobijiana tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹ Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina

pajamatabĕnainavanapaename, jai Jesús
pijajivijavabelia.

*Pacuenia vajaitaxuto belámparabĕ yabara peliv-
aisi*

(Lc 11.34-36)

²²⁻²³ Icatsia Jesús jumaitsi petsutoyenepanajava-
vata pijajivi ayaibitsaĕtoxanetojavabelia:

—Lámparabĕ bo ĕnĕtuatuajĕta itayoteca
xaniavaetsia vajataenexa. Bajara pijinia itsi
paneitaxuto ata. Paneitaxutoxanepanaexae
xaniavaetsia panatsivajĕnaetaneme. Itsa
paitaxutobejemĕ tsipae, nexata xaniavaetsia apo
panatsivajĕnaetaemĕ tsipae. Pacatsitaaitaquiri
saya tsipae. Bajara pijinia itsi panejamatabĕcuene
ata. Dioso itsa pacajamatabĕcueneitayota,
pajitsipaename paneexanabiabinexa pacuenia
Dioso pacaitoroba. Nexata xaniavaetsia pajina-
vanapaename. Itsa panajamatabĕxainaejitsipame
bitso panexainaejava ĕpaxamĕnexa, nexata
bitso pajamatabĕcueneitaquirimĕ tsipae, jai Jesús
pijajivijavabelia.

*Pacuenia Jesús pijajivi muxujioba bitso pejitsi-
paeyaniva palata yabara pelivaisi*

(Lc 16.13)

²⁴ Icatsia Jesús jumaitsi petsutoyenepanajavata
pijajivi ayaibitsaĕtoxanetojavabelia:

—Itsajivi ata acuenebi caecuenia
petonacuenebijava anijanĕbeje pijatuxa-
nenĕbejejavabelia. Caenĕjavabelia, ponĕ jitsipa
petonacuenebinexa, tonacuenebijitsipa.
Ponĕjavabelia apo jitsipae petonacuenebijava, apo
tonacuenebi tsipae. Bajara pijinia itsi pajivi bitso

jitsipa Dioso. Pajivi bitso jitsipa Dioso, nexata ita tonacueneba Dioso, acuenebi bitso pejitsipaejava palata, jai Jesús pijajivijavabelia.

Pacuenia Dioso pijajivi eveta mapanacuataje yabara pelivaisi

(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpananaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁶ Pataema baratsui-

monae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsui monae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa.

²⁷ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ 'Bajaraxuata pëtsa bitso pasivanajamatabëxainame ëpananaxatabijavanexa. Pacanaëjëre pacuenia vitsabapona pematono vayafojava. Bajarapamatono apo natsijumanacuenebi.

Penaxatatsijavanexa ata apo natsijumaexanae.
²⁹ Bajayata nacuaevetsinēmi Salomónpijinē, bitso pexainaenēmi. Naitabētsiaya naxatababiaba bitso pexaniaviriajavanē. Itsiata baitsi jane Salomónpijinē penaitabētsijava matatoxenetsia bitso aitabē mapamatonotoxije. ³⁰ Paxamē bevelia panejumecovēnētsivi Dioso, asaēya bepajumecovēnētame Dioso papecaevetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabēyaexana ponamatonotoxi, bajara pijinia pacuenia paxamē ata Dioso pacaxatabiana piaitabējava itsa pajumecovēnētame Dioso.
³¹ Bajaraxuata pētsa jamatabēbējaiya pajamatabējumaitsimē: “¿De tsaeta xua xaenatsi? ¿De tsaeta xua matavējēa apaenatsi? ¿De tsaeta xua naxatabianatsi?” pajamatabējamē pētsa.
³² Pamonaē Dioso apo pejumecovēnētsivi, bajarapacuenia bitso sivanajamatabēxainabiaba ēpexaejavanexa, ēpenaxabijavanexa ata. Itsiata baitsi jane paneaxa paxainame, athēbētatsia peecaenē. Bajaraponē yapētane daxita xua panamatavenoname. ³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabēxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabēcuenebējamē ajena pitsijavata itsacuenejavayo yabara, pētsa caecuenia payajavajamatabēcuenebējamē xua yabara meravia

pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bjaraxuata ajena pitsijavata apo besivajamatabëcuenebëjaitsi xua meravia pitsijavata nacatocopiapatsijitsia, jai Jesús pijajivijavabelia.

7

*Pacuenia Jesús pijajivi muxujioba pitaxutotsoni-
ataenexa itsamonae ata, pacuenia bajarapamonae
ata Dioso itaxutotsoniatanetsi, yabara pelivaisi
(Lc 6.37-38, 41-42)*

¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panataneme pepacueni bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsi-aexanaenatsi,” pajamë pëtsa. Tsipaji paxamë ata pijinia bajarapitsineconi ita paxainame, Dioso bitso ayaicuenia pacananeconitsiaexanaejitsipa.

² Itsamonae pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene ita paexaname, itsamonae pijinia bajarapacuenia pacabaracuaicuaijai tsipae. ³ Bjaraxuata paxamë pepacueni bepaneaneconijibivi nataeya pëtsa pamuxujiobame itsajivi pijaneconi

yabara. Tsipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë. ⁵ Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonaе patsipaebi atamë, apo yaiy-atae bajarapalivaisi. Tsipaji saya capocaponabi-aba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaе apo yaiyatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaе, jai Jesús pijajivijavabelia.

*Pacuenia Jesús pijajivi tsipaeba pacuenia Dioso-javabelia vajëtaponaеjitsia yabara pelivaisi
(Lc 11.9-13; 6.31)*

⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pavajëtaponare Diosojavabelia bajayajebi ata pacuenia bajayajebi ata pajaitsipame panecaxitarabinexa itsa pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. ⁸ Bajarapacuenia asaëyata pavajëtaponare Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitarababiaba. Pajivi ata baupa docodocotabiaba, tobaupatabiabatsi.

⁹ 'Paxamë papebijivimë panexi panexainaevi. Panexënatonëyo itsa pacavajëta panbë, apo panacoxirajutsimë tsipae iboto. ¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

¹² 'Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso Moiséspijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

*Tsiquiribaupayo epatajërëtsialia yabara pelivaisi
(Lc 13.24)*

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pajonemeya tsiquiribaupayojavalia panepatsinexa Dioso pijanacuayabelia. Tsipaji pinijibaupa, pinijinamutonua, pata infernojavabelia. Nexata jivi ayaibitsaëtoxanetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyonua, bajarapanamuto pata matababi apo peverevereceaeva pexinaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

*Pacuenia peubinaënë itsa nacuaita, nayapëtane
pavirianaecuene yabara pelivaisi
(Lc 6.43-44)*

¹⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xania panayajivitaema. Pamona saicayacuenia Dioso pejumelivaisivecua jivi tsipaebapona, bajarapamona najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamona Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacueneje. Peubinaënë itsa nacuaita, yapëtanetsi ponaecuai xanepana

vajaxaenexa. Nexata bajaraponae cuaixanetsi. Ponae pijinia pibisiacuai nacuaita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaënë itsa nacuaita, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuenetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponae pexaniana, pexaniacuai pijinia nacuaita vajaxaenexa. Ponae pijinia pibisiana, ëpiabejecuai nacuaita. ¹⁸ Pexaniana pexaniacuai nacuaita. Apo nacuaitsi piabejecuai. Pibisiana pijinia apo nacuaitsi pexaniacuai. ¹⁹ Daxita ponaenë nacuaita pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota. ²⁰ Bajara pijinia pacuenia paxamë ata payapëtaename itsa pacuenetaename xua exanavanapa pamonae saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi

(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Daxita pamonae: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata

pamonae exanavanapa taxa, athëbëtatsia peecaenë, pejitsipaecuenia, ëbjarapamonae jonena taxa pijanacuayabetsia. ²² Pamatacabi copiapatsiana pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pinijicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi (Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi.

25 Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. 26 Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. 27 Tsipaji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

28 Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabëcuenenabenajaca. 29 Jesús pejumetaevitsi bitso jamatabëcuenenabenajaca tsipaji Jesús livaisi tsipaeba pinijijamatabëcuene pexainaenëcuenia. Apo tsipaebi pacuenia judíovi pecujarubivi tsipaebabiaba.

8

*Pacuenia Jesús jamatejemayaexana bajayajebi
bitso peperabëtsabanaenë yabara pelivaisi
(Mr 1.40-45; Lc 5.12-16)*

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi. ² Nexata imoxoyotatsi bajayajebi bitso peperabëtsabanaenë. Pitabarata pematabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjëpa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

³ Nexata Jesús pecobeta perabëjayalia bitso peperabëtsabanaenë. Jesús jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ⁴Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacuene baja pecavecuaajibijava niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata sacerdotenë cataena pecavecuaajibijava baja niavitanejavami, jai Jesús bajaraponëjavabelia.

Pacuenia vajabitsaë pijacapitán pijabota

*petonacuenebaponaponaenëtsi, Jesús tojamate-
jemayaexana yabara pelivaisi*
(Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaëvi pijacapitán Jesús imoxoyorenatsi pevajëtsinexatsi. ⁶ Vajabitsaëvi pijacapitán bitso ayaicuenia vajëta Jesúsjavabelia. Jumaitsi:

–Petuxanenë, tajajivitonë raja tajabota camata boboca. Bitso cuenabatsi. Pinijicuenia navixae-taeyabiaba, jai.

⁷ Nexata Jesús jumaitsi capitánjavabelia:

–Xanë ponaenajë nijaboyabelia. Nexata catojamatejemayaexanaenatsi nijajivitonë, jai Jesús.

⁸ Nexata capitán jumaitsi Jesúsjavabelia:

–Petuxanenë, xanë raja bitso beveliajamatabëcuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. ⁹ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaëvi tajajivi taitorobicuenia tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa xanëjavaberena, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa cacaëjëpa. Nexata saya maveliaje ënijume itorobare saya ënijumeta

tajajivitonē tanetojamatejemayaexanaenexamē, jai capitán Jesúsjavabelia.

¹⁰ Jesús itsa jumetane bajarapacuenia capitán pejumaitsijavatsi, nexata Jesús jamatabēcuenenabenajaca. Nexata Jesús jumaitsi pepēnagonaevitsijavabelia:

—Xaniajanē pacuenia pacatsipaebijitsiatsi. Israel nacuapijivi nejumecovēnētsi ata, itsiata caeto ata apo caxitajarabaxuabinē xanējavaberena bitso tanesivanajamatabēcuenecopatsinē pacuenia mapacitán nesivajamatabēcuenecopatsiaya jumait-sije. ¹¹ Nexata pacatsipaebatsi paneyapētaenexa. Apo judíovi ata raja, ayaibitsaētoxanetonē daxitanacuanēpijivi, Dioso jumecovēnētsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinē yajava, nabani-ana. Isaacpijinē ata, Jacobpijinē ata yajava, nabaniana. ¹² Itsiata baitsi jane judíovi, pamonae picani Dioso athēbētatsia toxaniavaetatsi peyajavajinavanapaenexatsi, bajarapamonae caranata apo jumecovēnētsi Dioso. Nexata bajarapamonae infiernojavabelia Dioso xuabianatsi. Bajarajota nuna. Navonosiniana bitso penavixaetaexae, jai Jesús mapacueniaje pepēnagonaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanējavaberena nesivanajamatabēcopatsiaya jumaitsimē tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonē baja tojamatejematsi.

*Pacuenia Simón Pedro pijava pena Jesús toja-
matejemayaexana yabara pelivaisi*

(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. ¹⁵ Nexata Jesús cobejayata peromaebanucaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

*Pacuenia ayaibitsaëto jivi, piavitanevi, Jesús ja-
matejemayaexana yabara pelivaisi*

(Mr 1.32-34; Lc 4.40-41)

¹⁶ Itsa baja ajena meravitsia, Jesús javaberena tocapatatsi ayaibitsaëto dovathi peyajavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuaajibiaexanaena vavaavitanejavami,” jai bajayata tajëvelia Isaíaspijinë Jesús yabara.

*Pacuenia picani Jesús jamatabëpënaponatsi itsa-
monae yabara pelivaisi*

(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronaejavatsi, pijajivi junata pepënuabinexatsi pucaxaneto itsapanabelia.

19 Nexata bajarapaepatota judíovi pecujarubinē Jesús imoxoyorenatsi. Judíovi pecujarubinē jumaitsi Jesúsjavabelia:

—Petuxanenē, itsabelia poname, capēnaponaeenatsi cajena, jai.

20 Nexata Jesús jumaitsi judíovi pecujarubinējavabelia:

—Itsa nepēnaponaejitsipame, apo napatabiabimē tsipae tajabota nenacueraevetabiabinexa. Tsipaji tajabo apo xainaenē. Namo pijamēthēanē xaina pepatabiabinexa pemajitabiabinexa. Baratsui ata pematapenanē xaina. Itsiata baitsi jane xanē, Daxitajivi Pematapijinēnē, itsajavabelia ata apo xainaenē itsajota nacueraevetabiabijitsianē, jai Jesús judíovi pecujarubinējavabelia.

21 Nexata Jesús pijajiviyajuvēnēnē jumaitsi Jesúsjavabelia:

—Tajatuxanenē, caeepatoyo abaxē necopare tamēthēsinaexa taxa petēpaenē, jai.

22 Jesús nexata jumaitsi pijajivitonējavabelia:

—Naxanitsia. Nepēnaponare. Copare matacabi apo pevereverecaexa apo pexainaevinexa pemēthēcaenexatsi nijamonaemi itsa tēpa, jai Jesús pijajivitonējavabelia.

Pacuenia Jesús itaveta joviboxaneto, malataca yajava, piayajavami yabara pelivaisi

(Mr 4.35-41; Lc 8.22-25)

23 Jesús, pijajivi yajava, runa jera ēnēabereca. Nexata Jesús pijajivi jerata yajavanajetaruca pucajava. 24 Nexata jemata pinijijoviboxaneto najetaruca. Malatacaxanetonē bitso ayai. Nexata malataca jera ēnēaberena mera epabajarabapona.

Itsiata Jesús jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba.

²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapitsapa Gerasa nacuata yabara pelivaisi

(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuyabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava.

29 Nexata dovathivi peyjavaponaponaenēbeje vavajaibeje.

—Jesús, Dioso pexēnatomē, ¿detsa xua namatavenoname paxanēbejjavaberena? ¿Dioso tsaja daxitajivi penaneconitsia exanaematacab-inexavajēnaeya patame patanenaneconitsiaex-anaenexamēbeje? jaibeje Jesúsjavabelia dovathivi peyjavaponaponaenēbeje.

30 Nexata bajarajota, imoxoyo petsutojavata, marranobitsaētoxaneto xaevanapa. 31 Nexata dovathivi bitso vajēca Jesúsjavabelia. Jumaitsi:

—Itsa panexuabijitsiamē maponēbejevecuaje, panetocopare patajonenexa marranobitsaētoxanetojavabelia, jai.

32 Nexata Jesús jumaitsi dovathivijavabelia:

—Paponare baja panejonenexa marranobitsaētoxanetojavabelia, jai.

Nexata bajaraponēbeje dovathivi vecuapitsapatsibeje. Nexata baja marranobitsaētoxanetojavabelia junua dovathivi. Nexata daxita bajara pamarranobitsaētoxanetomi kujinaeyeca. Pucaxaneto itapajanituareca othopareca. Bajarajota daxita marranobitsaētoxanetomi meneta bubuna.

33 Bajara pamarranobitsaētoxanetomi pevetavanapaevi, rēcēpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuapitsapa dovathivi peyjavaponaponaenēbeje.

34 Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajētatsi. Ponare baja patajanacuavecua, jai bajarapamonae Jesúsjavabelia tsipaji cujunavatsi.

9

Pacuenia Jesús jamatejemayaexana petabusipacuenabinētsi yabara pelivaisi
(Mr 2.1-12; Lc 5.17-26)

¹ Jesús runareca jera enēabereca. Nicalialia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinētsi. Pacamayota bocabiaba, yavētacarapatatsi. Jesús jamatabēcueneyapētane pacuenia sivanajamatabēxainatsi petocapatsivitsi. “Nacatojamatejemayaexanaenatsi cajena,” pesivajamatabējaijavatsi Jesús jamatabēcueneyapētane. Bajaraxuata petabusipacuenebinētsijavabelia Jesús jumaitsi mapacueniaje:

—Tajabanänë, jamatabēcuenēbarëyamëre. Pibisiacuene rabaja nexanaeconimi cavecuaajibiaexanatsi, jai Jesús petabusipacuenabinētsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabēxainena.

—Maponë Jesúsje Dioso apo pejitsipaecuenia cuaicuajiai, jamatabējai tsenae judíovi pecujarubivi Jesús yabara.

⁴ Jesús jamatabēcueneyapētane judíovi pecujarubivi bajarapacuenia pesivanajamatabēxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. ⁵ Paxamë apo pacacaëjêpae ata itsajivi pibisiacuene pexanaeneconi panevecuaajibiaexanaenexa, pacacaëjêpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjêpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjêpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tshipaji jivi caëjëpaeyaexaname pinijicuene pexanaenexa, jai.

Pacuenia Jesús pijajivitonënexa junata Mateo yabara pelivaisi

(Mr 2.13-17; Lc 5.27-32)

⁹ Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucavejavata taeyeta Mateo. Mateo gobierno pejamatabëcuene impuestomatamo pematamoyanijobabiabinë. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

¹⁰ Nexata Mateo junata Jesús pebarënanabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, piajamatabëcuenebejevi. Jesús pijajivi nayajavaeca bajarapamesajavata.

¹¹ Nexata fariseovi itsa tane bajarapacuene,

jamatabëcuenenavëxaniabiaya jumaitsi Jesús
pijajivijavabelia:

—Papecacujarubinë rabaja Jesús
naneconita Diosojavabelia. Tsipaji gobierno
pejamatabëcueneta impuestomatamo
pematamoyanijobabiabivijavata, piaja-
matabëcuenebejevijavatanua, naxaeyeca pexaejava,
jai fariseovi Jesús pijajivijavabelia.

¹² Jesús nexata jumetaeyeca bajarapacuenia
fariseovi pejumaitsijava. Nexata Jesús jumaitsi
fariseovijavabelia:

—Pevaëbinë raja apo vaëbi pejamatabëjemavi.
Pevaëbinë raja piavitanevi vaëba. Bajara pijinia
xanë ata itsinë. Sivapatajopajë tajunatsinexa
pibisiajamatabëcuenevi pecapanepaenexatsi
Diosojavabelia. ¹³ Paponare. Palebianame Dioso
pejumelivaisibaxuto. Nexata payapëtaename
pajamatabëcuene yabara jumaitsi Dioso
pejumelivaisibaxutota mapacueniaje: “Jitsipajë
paneitaxutotsoniataejava itsamonae. Apo
jitsipaenë saya patanetobeyabiabijavamë
dajubicuene ofrendacuenia patanerajutabi-
abinexamë,” jai Dioso pejumelivaisibaxutota.
Xanë raja apo sivapatajopaenë tajunatsinexa
pamonae baja aneconijibi tsavanapae.
Biji rajane sivapatajopajë tajunatsinexa
pijaneconi pexainaevi. Junataponajë
bajarapamonae pecopabinexa pibisiacuene
pexanaejava penajamatabëcuenepënëyorotsinexa
Diosojavabelia, jai Jesús fariseovijavabelia.

*Pacuenia Jesús yanijobatsi pamatacabibeje
jivi vajëtaƨona Diosojavabelia pexaejava apo*

*pexaeyabiabixae yabara pelivaisi**(Mr 2.18-22; Lc 5.33-39)*

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje: —Petuxanenë, paxanë pataxaejava apo paxaeyabiabinë pamatacabibeje pavajëtaponajë Diosojavabelia. Bajara pijinia itsi fariseovi ata pamatacabibeje vajëtapona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtapona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi pevecuacaponanexatsi itsajavabelia, nexata bajara-pamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús Juan pijajivijavabelia.

¹⁶ Nexata Juan pijajivi perujujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipae-bilivaisi. Juan pijajivi anijajamatabëcuenebeje pexainaeyaniva, perujujamatabëcuene

baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujumatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mr 5.21-43; Lc 8.40-56)

¹⁸ Jesús livaisi petsipaebanucaejavata Juan pijajivijavabelia, judíovi penacaetuatabiabibo

pevetsinē parena Jesúsjavaberena. Nexata bajaraponē Jesús pitabarata yaiyataeya pematabacabēta nucajunua. Jumaitsi Jesúsjavabelia:

—Taxēnatovayo rabaja aeconoxae netotēpa. Itsi-ata baitsi jane itsa poname tajaboyabelia, nexata itsa netoperabējayatsianame necobeta, icatsia ne-toasaē tsane, jai bajaraponē Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinē pepēta Jesús, pijajivi yajava, napona. ²⁰ Nexata Jesús namutua penajetarucaejavata, pepēnēverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepēnēvelia ponataba, jivibitsaētoxaneto tuatujējavalia. Nexata bajarapova tojayataba Jesús penaxatatsijavacopia. ²¹ Bajarapacuenia tojayataba Jesús penaxatatsijavacopia tsipaji bajarapova jamatabējumaitsi mapacueniaje:

—Itsa tojayatabianajē Jesús penaxatatsijavacopia, nexata tavitanejavami nevecuaajibi tsane, jamatabējai bajarapova.

²² Nexata Jesús napēnēyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabēcuenēbarēyamēre. Xamē nesivajamatabējumaitsimē: “Itsa tojayatabianajē Jesús penaxatatsijava, nexata tavitanejavami nevecuaajibi tsane,” nesivajamatabējamē. Bajaraxuata jamatejemamē baja, jai Jesús bajarapovajavabelia.

Bajarapacuenia Jesús pejumaitsijavata bajarapova jamatejema baja. ²³ Bajaraxuacujinae

Jesús jane baja pata judíovi penacaetutabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pematanueyabavanapaejava petëpaevayo.

²⁴ Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jume-capocaponatsi bajarapacuenia pejumaitsijava.

²⁵ Jesús nexata bajarapamonae bovecua pitsapaeyaexana. Nexata itsaxuayolia

petëpaevayo boca, Jesús joneya. Cobepita petëpaevayo. Bajarapovayo baja namatacota.

²⁶ Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsi-beje Jesúsjavabelia:

—Jãjã, payapëtanijibeje cajena, jaibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesi-vanajamatabëcuenecopatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacujava.

Pacuenia Jesús natsipaebiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icatsia itsamonae Jesús tocaparenatsi apo pecuaicuaijainë. Bajaraponë dovathi peyajavaponaponaenë.

³³ Nexata apo pecuaicuaijainë Jesús dovathi itsa

vecuacapitsapa, cuaicuajai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneje, najai bajarapamonae.

³⁴ Itsiata bairi jane fariseovi jamatabëcuenenavëxaniabiaya jumaiti Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pe-livaisi

³⁵ Jesús najetaruca daxita tomaranëjava, tsiquiritomaraxijava ata. Nexata bajarapatomaranëjava judíovi penacaetuatabiabibonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevimi. ³⁶ Jesús jivi itsa tane, itaxutobejobiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa it-sacuenjavayo ata. Jesús jivi sivajamatabëjumaiti mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

³⁷ Nexata Jesús jumaiti pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa.

Abaxë sajina ayaibitsaëtoخانeto. Itsiata baitsi jane Dioso panetonacuenebivi pacaejiviyomëbeje saya. ³⁸ Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

*Pacuenia Jesús pijajivi ayaibitsaëtoخانetoyajuvënëvi itapeta saya doce ponëbeje apóstolevinexa yabara pelivaisi
(Mr 3.13-19; Lc 6.12-16)*

¹ Jesús pijajivi ayaibitsaëtoخانetoyajuvënëvi junata saya doce ponëbeje Jesús pebarënacaetuatsinexa. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje.

³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëjavabelia canajetsijitsiatsi Jesús

pijavajabitsaë pecobeyabelia pebeyaxuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare

jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa.

⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa.

⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua

bajayajebi bitso peperabëtsabanaevi. Pavecuacapitsaponaenamenua dovathi peyajavajinavanapaevi. Amoneya raja

pacacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa

pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata.
¹⁰ Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ 'Itsa papatabiabianame pinijitomarata, tsiquritomarayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaeename, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane.

¹³ Itsa bajarapabopijivi pacacopiapitsiana xaniavaetsia, nexata pacuenia Diojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia

itsa panataxuatsapērēvarēbianame, bajara-patomarapijivi yapētaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi.
¹⁵ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomara-pijivi apo pacacopiapitsi tsane. Paneconivajētota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajēto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajēnaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejasi tsiayaitsi itsa jinavanapa pianaepanaevi nevēthē tuatujēata, bajara-paitsimē tsane. Nexata pacuenia unupijivi nayajivitaeyajinavanapa pitsacueniabiyativatsi, bajara paitsimē tsane. Pacuenia ata ucucu aneconijibia jinavanapa, bajara paitsimē tsavanapae tsane. ¹⁷ Xania baja tsane. Patajajivixaemē raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaponaena. Judíovi penacaetuatabibonējava pacajumatitibabeyabiabiana penaneconitsivi pejumaconitabiabimacata.

18 Patajajivixaemë pacanubiananua nacuaeetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaevavabelia, apo judíovi ata pitabarata. 19 Itsiata baitsi jane itsa pacanubiana nacuaeetsivi pitabarata, pëtsa pajamatabëbëjamë panenayajivicuaicuaijainexa bajarapamonaevavabelia. Tsipaji raja paepatota panayajivicuaicuaijamëjitsia, bajarapaepatota Dioso pejamatabëcueneta pacacuaicuaijiaexanaena. 20 Itsa panayajivicuaicuaijamë tsane, paxamë panijacuata apo pacuaicuaijamë tsane. Espíritu Santo raja pacacuaicuaijiaexanaena.

21 'Itsamona peamatapijivi, pejuyapijivi ata, canajetsiana nacuaeetsivijavabelia pebeyaxuabinexatsi. Itsamona nacoxicanajetsiana nacuaeetsivijavabelia pebeyaxuabinexatsi. Itsamona canajetsiana paxa, pena ata, nacuaeetsivijavabelia pebeyaxuabinexatsi.

22 Daxita nacuapijivi pacaitoya tsane patajajivixaemë. Pajivi bejiobiaexanae atatsi tsane, itsiata itsa casaë tsaponaponae tsane tanejumecovënëtsijava, bajarapajivi capanepaenatsi Dioso pijanacuayabetsia. 23 Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsiatsi. Daxita Israel nacuata penaetomaranëjava abaxë patsipaebiveretsinejevamë pexanialivaisi, xanë, Daxitajivi Pematapijinënë, itacarajeta icatsia patsianicajë.

24 'Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pija-

jivitonë, apo jamatabëcuenematatoxenetsi pijatuxanenë. ²⁵ Pacuenia pecujarubinë itsamonae copiaya bejiobiaexanatsi, bajarapacuenia icatsia bajaraponë pecujarubivi ata bejiobiaexanaenatsi. Pacuenia petuxanenë copiaya bejiobiaexanatsi, bajarapacuenia icatsia pijajivitonë ata cotocaevi bejiobiaexanaenatsi. Xanë panijatuxanenë: “Beelzebú, daxita dovathivi pijatuxanenë,” nejai tsabiabi itsamonae. Nexata pijinia patajajivix-aemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

*Pacuenia Jesús pijajivi tsipaeba pecujnaviyaniva pebexuabijavatsi yabara pelivaisi
(Lc 12.2-7)*

²⁶ Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisiacuene exana, bexëjavabelia cueneyapëtaeponaenatsi daxitajivi.

²⁷ Palivaisianë muetsia vajeapatojavata pacatsipaebaponatsi, bajarapalivaisianë paxamë pinijjumeta patsipaebaponaename jivi penacaetuatabijavata. ²⁸ Pëtsa pacujunavame jivivevi ata. Bajarapamonae pacabexuabi ata tsipae, acuenebi matavëjëa papecaitsacueniabinexa pepo panejamatabëcuenejavabelia. Biji rajane pacujunavare Dioso, ponë cajëpatsi papecaxuabinexa infiernojavabelia papecabexuabicujinae.

²⁹ Anijanëbeje baratsuitobeje namatamota saya caepalatanëyo. Itsiata baitsi jane caenë ata barsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva

baratsui ata. ³⁰ Dioso cajena bitso pacaasiva baratsui matatoxenetsia. Nexata panematana-toxi ata, caematanatoyo canacujitsia, Dioso namataējēta. ³¹ Bajaraxuata pētsa pacujunavame itsacuenejavayo ata. Tsipaji paxamē Dioso bitso pacaasiva baratsuitoxti matatoxenetsia, jai Jesús pijajivijavabelia.

*Pacuenia Jesús pijajivi apo benayavajunuax-
ainae Jesús pijajivicuene yabara pelivaisi
(Lc 12.8-9)*

³² Icatsia Jesús jumaitsi pijajivijavabelia:

—Daxita pamonaē tajajivi, jivi pitabarata itsa navajunupaebiana tajajivicuene, xanē ata vajunupaebianajē bajarapamonaē tajajivicuene taxa, athēbētatsia peecaenējavabelia. ³³ Pamonaē jumai tsane itsamonaējavabelia: “Xanē cajena Jesús apo pijajivitonēnē,” jai tsane, nexata pijinia bajarapamonaē yabara xanē jumaitsinē tsane taxa Diosojavabelia: “Mara pamonaē apo tajajivije,” janē tsane, jai Jesús pijajivijavabelia.

*Pacuenia Jesús apo penajuajumecovēnētsixae,
nacaemonaē ata apo najamatabēcuenējēpaē tsane
yabara pelivaisi*

(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pētsa panesivajamatabējumaitsimē mapacueniaje: “Jesús rabaja patsica mapanacuayabetsicaje daxitajivi mapanacuataje najamatabēcuenējēpaeya pejinavanapaeyaex-anaenexa,” panesivajamatabējamē pētsa. Bajaraxuanexa apo patsinētsica. Biji rajane xanē tapatsixaetsica mapanacuayabetsicaje,

jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonaē ata. Napijavajabitsaē tsane namataenetsia. ³⁵ Xanë apo tanenajuajumecovënëtsixaebeje, pebibeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. ³⁶ Nexata xanë apo tanenajuajumecovënëtsixae, caejivi canacujitsia beprijavajabitsaējivi taenatsi pijamonaejivi ata.

³⁷ 'Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepënaponaē tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejiobiaexanaeyanivatsi, pebeyaxuabiyativatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonaē xa-

*niavaetsia copiapita Jesús pijajivi yabara pelivaisi
(Mr 9.41)*

⁴⁰ Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacueene matamotsianatsi Dioso, jai Jesús pija-jivijavabelia.

11

*Pacuenia Juan jivibautisabinë itoroba
pijajiviyajuvënëvi Jesúsjavabelia yabara pelivaisi
(Lc 7.18-35)*

¹ Jesús baja najumevereta pijajivi doce ponëbejejavabelia livaisi petsipaebijava. Nexata

baja Jesús pona livaisi petsipaebinexa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaëjava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebaona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaëjava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpavimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecua tsipaebaponajë bepejiobivijavabelia. Daxita bajaraxua taexanaponaëjava patanetaejavamë, patsipaebianame Juanjavabelia. ⁶ Pajumaitsimënu

tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota?

⁸ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenije. Pamonae naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. ⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë.

¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan

yabara, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumeliv-
aisipaebinënexa, jivi pecatsivajënae
najamatabëcuenexaniavaetsinexa,

jai bajayata Dioso pejumelivaisibaxutota tapat-
sivajënaeya Juan tanelivaisi paebanajetarucejaja-
vanexa yabara.

¹¹ Xaniajanë pacuenia pacatsipaebijitsiatsi.
Juan ayaijamatabëcuenenë mapanacuataje.
Nexata bajayata Juan pevajënaeya papro-
fetavi jinavanapa, itsanë ata Juan apo
jamatabëcuenematatoxenetsitsi. Itsiata baitsi
jane pajivi beveliajamatabëcuenejivi ata,
itsa nejumecovënëta tacapanepaejavanexa,
bajarapajivi ayaijamatabëcuenejivi Dioso
exanaenatsi Juan matatoxenetsia.

¹² 'Juan jivibautisabinë petaxuxuabijavaveli-
acujinae, Dioso pitorobilivaisi jivi petsipae-
banajetarucejajava mapamatacabijavaberena
ataje, ayaibitsaëtoxfaneto picani jivi jitsipa
Dioso pitorobilivaisi pejumecovënëtsinexa.
Itsiata itsamonae pesaëta caranatapona
bajarapamonae pejumecovënëtsiyaniva Dioso
pitorobilivaisi.

¹³ Juan penaexanaevajënaeya,
daxita Diosojumepaebivimi profetavi tajëvelia
vajunupaebapona itsamatacabi Dioso pijajivi
pevetsijavanexa. Dioso Moiséspijinëta
penajumecopatsilivaisi ata, tajëvelia vajunupaeba
Dioso pijajivi pevetsijavanexa. ¹⁴ Itsa baja
jamatabëpajumecovënëtame, pajumecovënëre
xua aeconoxae pacatsipaebijitsiatsi. Dioso
pejumelivaisibaxutota tajëvelia jumaitsi

mapacueniaje: “Elíaspijinē icatsia patsiana,” jai. Bajarapacuenia tajēvelia itša jumaitsi, Juan jivibautisabinē yabara jumaitsi. Tsipaji pacuenia jamatabēcueneitsi profeta Elíaspijinē, bajara jamatabēcueneitsi Juan ata. Nexata Juan pepatsivajēnaeya, tajēvelia yapētanetsi pacuenia Juan exanaejitsia. ¹⁵ Pajivi jamatabēnejumeyapētane patacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapētaeyaexanaenajē itsamonaejavabelia bajarapamonae xaniavaetsia papecayapētaenexa pacuenia paxamē pajamatabēcueneitsimē tsavanapae? Jumaitsinē meta tsane paxamē yabara mapacueniaje: “Bajarapamonae abaxē saya bepejevaxijivixi, pajivixi tomara tuatuajējava banamuxusitenavanapa. Pejevaxijivixi itša namuxusitenavanapa, bavavajai tsenae penajua namuxusitenaevijavabelia. ¹⁷ Pevavajaijavata bajumaitsi: ‘Pacatoobecatsi picani flauta. Itsiata apo payavajibimē. Pacatonaxēanecatsi picani penemuxunanuevajinexa ata. Itsiata apo panuemē, bajai tsenae pejevaxi penajua namuxusitenaevijavabelia. Bajara saya jamatabēcueneitsi pamonaē aeconoxae jinavanapa mapanacuataje,” janē meta tsane paxamē yabara. ¹⁸ Juan jivibautisabinē Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajētaƀona. Vinora ata apo apaeyabiabi. Nexata bajaraponē yabara

jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ¹⁹ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaë ata piagamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuenepo pexaniajaijamatabëcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovënëtsitsi yabara pelivaisi (Lc 10.13-15)

²⁰ Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

21 ¡Bitso bepajobimë tsane paCorazín tomarapijivimë! ¡Bitso bepajobimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi. 22 Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena.

23 Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeconi yabara. Nexata abaxë mapamatacabi ataje jivi jinavanapaejitsipa bajarapatomarata.

24 Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

*Pacuenia Jesús pijajivi junata pe-
jamatabëcuenesaëyaexanaenexa peja-
matabëcuenecueranaejavavecua yabara pelivaisi
(Lc 10.21-22)*

²⁵ Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiätsi. Tsipaji pamonaë bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonaë yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicue yabaraje. ²⁶ Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtaë pacuenia xanë jamatabëcuenëitsinë, Dioso pexënatonë. Caenë taxa Dioso nejamatabëcueneyapëtaë. Itsajivi ata apo jamatabëcueneyapëtaë pacuenia taxa Dioso jamatabëcuenëitsi. Caenënë xanë, pexënatonë, jamatabëcueneyapëtaniji. Pamonaë tojitsipajë tayapëtaeyaexanaenexa pacuenia taxa Dioso jamatabëcuenëitsi, bajarapamonaë ata yapëtaeyaexanaponaenajë.

²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacuene paneexanabiabijava yabara, xanëjavaberena paponare paneajamatabëcuenesaënexa

icatsia. ²⁹ Bueyubeje banavēsijumacaevetabeje petsivēsijumabuatsinexatsibeje yugovēnēja penacuenebinexabeje. Bajara pijinia pacuenia paxamē ata panajamatabēcuenecaevere patacatsijamatabēcuenebuatsinexa patacatsipaebilivaisi. Panejumecovēnētsianame pacuenia pacaitorobatsi patanetonacuenebinexamē. Nexata panevajēnaeyabelia panejamatabēcueneyapētaeponaename. Tsipaji xanē xaniavaetsia pacatsipaebaponaenatsi. Xanē beayaijamatabēcuenenē apo nataenē. Nexata bajarajota panajamatabēcueneevetsianame paneajamatabēcuenesaēnexa icatsia. ³⁰ Pacuenia bueyu tsivēsijumabuatatsi yugovēnēja petoyapēxanepanaenexatsi penacuenebijava, bajara pijinia pacuenia paxamē ata pacatoyapēxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi

(Mr 2.23-28; Lc 6.1-5)

¹ Judíovi penacueraevetsimatacabita Jesús, pijajivi yajava, najetaruca trigo pabianēja. Jesús pijajivi bitso piajani. Nexata trigoxu siricanajetarubena. Xuxaeyabuatapona.

² Nexata fariseovi tane Jesús pijajivi pesiricanajetarubenaejala trigoxu. Nexata fariseovi jumaitsi Jesúsjavabelia:

—Taema mapamonaaje. Dioso Moiséspijinëta penajumecopatsilivaisi vajanacaitavetsicue ne nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneneje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsiapaji bitso piajani. ¿Apo palebimë tsiapaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? ⁴ Davidpijinë joneya Dioso pijatemploboyalia. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsiapaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacuer-aevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo

matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonaë ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso pïajanixae, trigoxu xane. ⁸ Nexata xanë, Daxitajivi Pematapijinënë, netoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

*Pacuenia Jesús jamatejemayaexana pebi pecobetsaquenaenë yabara pelivaisi
(Mr 3.1-6; Lc 6.6-11)*

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiiboyalialia. ¹⁰ Nexata bajarajota pebi naeca, pecobetsaquenaenë. Itsamonaë fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara

neconitsijitsiatsi. Nexata fariseovi Jesús jamatabëcuenejëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsi- parecatsi meramëthëareca, penacueraevetsimat- acabita ata ponaejitsipa. Nexata jutsipaina pi- jaoveja. ¿Baja tsabaitsi jane? ¹² ¡Biji ra jivitonë bitso namatamota oveja matatoxenetsia! Bajaraxu- ata itsiata nacatoxanepana vajaexanaenexa pex- aniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaitsi pecobetsaque- naenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobex- anepanareca baja. Pecobetsaquenaiejavami baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajay- atami tajëvelia vajunupaebatsi Jesús yabara peliv- aisi

¹⁵ Jesús jamatabëcueneyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja

Jesús bajarapamonae vecuapona itsajavabelia. Jivi ayaibitsaëtoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyaniwa itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebiyaniwa itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. ¹⁹ Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. ²⁰ Pamonaë xanë tajumelivaisi pejumecovënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. ²¹ Nexata daxitajivi, apo judíovi ata, sivanajamatabëcuenecopatsianatsi bajaraponë pecapanepaenexa,

jai bajayata tajëvelia profeta Isaíaspijinë Dioso pe-
jumaitsijava Jesús yabara. Bajarapacuenia bajay-
ata tajëvelia jumaitsi Isaíaspijinë peyaquinaebaxu-
tota.

*Pacuenia itsamonae Jesús yabara ja-
matabëcuenenavëxaniabiaya jumaitsi: “Beelzebú raja
pesaëta Jesús dovathi jivivecua capitsapapona,” jai
yabara pelivaisi*

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotsëcënaenë,
apo penatsipaebinë. Bajaraponë dovathi
yajavaponapona. Bajaraponë Jesús jamate-
jemayaexana. Xaniavaetsia baja nexata
tane. Natsipaebanua baja. ²³ Jivi itsa tane
Jesús pejamatejemayaexanaejava bajaraponë,
jamatabëcuenenabenajaca. Nexata jivi najumaitsi
Jesús yabara:

—¿Matsaeta ponë Davidpijinë pemomoje, Dioso
pitorobinësicaje? najai bajarapamonae Jesús
yabara.

²⁴ Nexata fariseovi itsa jumetane bajarapacue-
nia jivi pejumaitsijava, fariseovi jumaitsi jivijav-
abelia:

—Mara ponë Jesúsje, dovathi jivivecua capit-
sapabiaba Beelzebú pesaëta. Beelzebú raja daxita
dovathivi pitorobinë, jai fariseovi jivijavabelia ja-
matabëcuenenavëxaniabiaya Jesús yabara.

²⁵ Jesús jamatabëcueneyapëtane pacuenia
fariseovi sivanajamatabëxainatsi. Nexata Jesús
jumaitsi fariseovijavabelia:

—Nacaenacuapijivi ata itsa navecuanat-
sanaejitsipa penasivanavajabitsaëtsinexa, na-
mataenetsia naverebiabijitsipa nacaenacuapijivi

ata. Bajara pijinia itsipae nacaetomarapijivi
 ata. Itsa navecuanatsanaejitsipa penasi-
 vanavajabitsaëtsinexa, nexata namataenetsia
 naverebiabijitsipa nacaetomarapijivi ata. Bajara
 pijinia itsipae nacaemonae ata. Itsa navecuanat-
 sanaejitsipa penasivanavajabitsaëtsinexa, nexata
 namataenetsia naverebiabijitsipa nacaemonae
 ata. ²⁶ Bajara pijinia itsipae dovathi ata.
 Dovathi jivivecua itsa capitsapaponaejitsipa
 pijajivi, dovathivi, nexata bepijavajabitsaënë
 taejitsipatsitsi pijajivi. Itsajamatabëcuene
 vecuaxinaejitsipa pijajivi. Pesaë ata apo
 xainapona tsipae. ²⁷ Paxamë ata panijajivi
 dovathi jivivecua capitsapabiaba. Nexata
 xanë Beelzebú pesaëta dovathi jivivecua itsa
 capitsapabiabajë, ¿detsa nexata ponë pesaëta
 panijajivi ata dovathi jivivecua capitsapabiaba?
 Caenë rabaja Dioso pesaëta. Nexata
 panijajivi ata pacayapëtane bajarapacuenia
 jamatabëcuenenavëxaniabiaya panejumaitsijava
 xanë yabara. ²⁸ Espíritu Santo raja pesaëta xanë
 dovathi jivivecua capitsapabiabajë. Nexata baja
 picani jivi beyapëtane Dioso baja petaxuxuabijava
 pijajivi pevetsijava paxamë tuatujëta, jai Jesús
 fariseovijavabelia.

²⁹ Fariseovi pecanaëjëtsinexa Jesús bitso
 piasaënëcuene dovathi matatoxenetsia, Jesús
 icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso
 piasaënë pijaboyalía peyacajërëtsinexa xua xaina
 pijabota. Itsiata itsa patsipa bajaraponë matatox-
 enetsia bitso piasaënë, nexata cobecëtabuatsipatsi.
 Taxucëtabuatsipatsi yajava. Matapania bajara-

pacuenia yacajërëtsipatsi daxita xua xaina pijab-
ota.

³⁰ 'Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tshipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ 'Bajaraxuata pacatsipaebijitsiatsi, Dioso caëjëpatsi daxitajivi pibisiacuene pexanaeneconimi pevecuaajibiaexanaenexa. Pibisiacuena jivi Dioso baracuaicuajai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuena baracuaicuajai Espíritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi.

³² Pajivi pibisiacuena nebaracuaicuajai ata, xanë, Daxitajivi Pematapijinënë, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuena baracuaicuajai Espíritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi

(Lc 6.43-45)

³³ Icatsia Jesús jumaitsi fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponae pijinia pibisianaë, nacuaita pibisiacuai. Caevirianaë canacujitsia yapëtanetsi itsa nacuaita. ³⁴ Bajara pijinia

pacuenia paxamē ata dovathi papijajivimē,
 panayapētaneme paneajamatabēcuenebejejava.
 Nexata apo pacacaējēpae panecuaicuaijainexa
 pexaniacuene yabara. Pajamatabēcuene
 bēpēnēa panejamatabēēthētota panaja-
 matabēxainame, panecuibovojotuatsina pitsapa
 panecuaicuaijainexa. ³⁵ Itsamonae pijinia
 majamatabēcueneitsije. Pacuenia vajaubinae,
 pexanianaē, pexaniacuai pijinia nacuita,
 bajara pijinia jamatabēcueneitsi itsamonae.
 Ponē pexaniajamatabēcuenenē, pexaniacuene
 yabara cuaicuaijai. Tsipaji pexaniajamatabēcuene
 xaina pejamatabēēthētota. Ponē pijinia
 pibisiajamatabēcuenenē pibisiacuene yabara
 cuaicuaijai. Tsipaji pibisiajamatabēcuene
 najamatabēxaina pejamatabēēthētota.
³⁶ Xaniajanē pacuenia pacatsipaebijitsiatsi.
 Pamatacabi Dioso naneconitsiaexanaena daxita
 pijaneconi pexainaēvi, caejivi canacujitsia,
 naneconitsiaexanaponaena caejumeyo
 canacujitsia pibisiacuenia pecuaicuaijaijava
 yabara. ³⁷ Pibisiacuenia panecuaicuaijaijava
 yabara Dioso pacananeconitsiaexanaena.
 Pexanialivaisi itsa pacuaicuaijamē tsabiabi tsane,
 nexata paneconijibimē tsane Diosojavabelia, jai
 Jesús fariseovijavabelia.

*Pacuenia pibisiajamatabēcuenevi Jesús picani
 itorobatsi Dioso pesaēta pinijicuene pexanaejava
 petsitaexanaenexa yabara pelivaisi*

(Mr 8.12; Lc 11.29-32)

³⁸ Fariseovi, judíovi pecujarubivi ata, jumaitsi
 Jesúsjavabelia:

—Jesús, pajitsipajë patataenexa Dioso pesaëta pinijicuene nexanaejava, patacayapëtaenexa pepacuene Dioso athëbëvetsica pecaitorobinëcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa pataneyapëtaenexamé Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinëmi profeta Jonáspijinë exanatsi, bajara ëpitsicuene taneexanaejava pacatsitajëtsianatsi. ⁴⁰ Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuenia xanë ata, Daxitajivi Pematapijinënë, bocaenajë mëthëta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Namatabëcuenepënëyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovënëtsivi. Xanë majotaje ponaponajë,

bitso ayaijamatabëcuenenënë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimënu a pibisiacuene paneexanaejavavecua. Bajaraxuata ayaineconi paxainame Diosojavabelia.
⁴² Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovënëtsivi. Bajarapova pacaneconitsiana. Tsipaji bajayata bajarapovami tajë nacuatabuverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayaijamatabëcuenenënë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimënu a. Bajaraxuata Dioso pacananeconitsiaexanaena, jai Jesús tajëvelia fariseovijavabelia, judíovi pecujarubivijavabelia ata.

*Pacuenia dovathi jivitonë peveja-
 matabëpitsapaecujinaetsi, icatsia naviarena
 pecovëyaberena petsijamatabëcaenexatsi icatsia
 yabara pelivaisi*

(Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonexa

penacueraevetsinexa bajaraponējavata. Itsa apo caxitajarabi ponējavabelia tsijamatabėjonejitsia, nexata dovathi jamatabėjumaitsi: ⁴⁴ “Naviatsianajē meta icatsia tajabomijavabelia, paboverena pitsapajē,” jamatabėjai dovathi, ponējavaverena pitsapa icatsia petsijamatabėjonenexatsi. Dovathi baja caevēa itsa naviarena, caxitajaraba peyajavaponapon-aenēmitsi. Nexata peyajavaponapon-aenēmitsi pejamatabēēthēto, dovathi tane bepēnēsajinecaebo, bepēnēxaniavaetetsibo, bepiracajuetetsibo. ⁴⁵ Nexata dovathi icatsia sivapona peyajavapatsinexarena itsadovathivi, siete ponēbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabėjunuatsi peyajavaponapon-aenexa. Belia jane baja pebi dovathivi bitso bejiobiaexanatsi. Copiaya abaxē caenē itsa tsijamatabēecatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonae aconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi

(Mr 3.31-35; Lc 8.19-21)

⁴⁶ Jesús abaxē jivi livaisi itsa tsipaeba bo ēnētuatuajēalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabēbarēcuaiquaijaitsi picani Jesús. ⁴⁷ Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamonae pina jitsipa pecabarëcuaicuajajava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijiv-inua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamona taenajivije, tajuyapijiv-inua. ⁵⁰ Tsipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinë pelivaisicuenia yabara pelivaisi

(Mr 4.1-9; Lc 8.4-8)

¹ Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata. ² Nexata pucaitapata jivi ayaibitsaëtoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelialia. ³ Nexata Jesús daxitacuene livaisianë tsipaeba jivijavabelialia. Jesús jumai tsaponae bajarapamonaejavabelialia mapacueniaje:

—Peubinë pona pabiabelialia peubinexa.

⁴ Nexata itsa pata pabita, peubixu pexucayabajarabicuenialia ubanajetaruca.

Pexucayabajarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepïjia juva. Tsipaji bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepëpiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matakënënsati peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsia nacuaïta. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. ⁹ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuene yabara Jesús jivijavabelia livaisi tsi-
paeba ëcomparacióncuenia yabara pelivaisi*

(Mr 4.10-12; Lc 8.9-10)

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë

papecaevetsijava. Itsiata itsamonae apo yapëtae bajarapacuenae. ¹² Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipae-bilivaisi, bajarapajivi xuayovajëto jumeyapëtane picani, nacofënëtsiana. ¹³ Bajaraxuata livaisi itsa tsipaebajë bajarapamonae, ëcomparacióncuenia tsipaebajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. ¹⁴ Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. ¹⁵ Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxu-totsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua

taena. Jumeyapëtaejitsipanua palivaisi jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcuenepeñëyorotsipa perujumatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isaíaspijinë peyaquinaelivaisita xua yabara tsipaebajë bajarapamonae apo tanejumeyapëtaejavanexa yabara.

¹⁶ 'Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi
(Mr 4.13-20; Lc 8.11-15)

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere
panejumeyapëtaenexa pajamatabëcuene xaina
palivaisi pacatsipaebatsi pabita peubinë
pelivaisicuenia. ¹⁹ Pamonae jumetae
ata Dioso pejumelivaisi, itsiata itsa apo
jumeyapëtae pejamatabëëthëtota, bajarapamonae
bepiothopaexu pabi tuatuajëjava penajetaru-
caenamutojumata. Nexata najetaruca dovathi.
Nexata bajarapamonae tsijamatabëjuvinejevatsi,
dovathi vecuapitatsi bajarapalivaisimi,
petsijamatabëubilivaisimitsi. ²⁰ Pacuenia pijinia
itsi paxu othopa ibopananëjumata, itsajota bitso
ira apo aitayaë, bajara tsijamatabëcueneitsitsi
itsamonae Dioso pitorobilivaisi. Bajarapamonae
jumetane Dioso pitorobilivaisi. Nexata
picani bajarapalivaisi barëyaya jumecovënëta.
²¹ Itsiata baitsi jane pacuenia irabereca apo
atabunepepiareca paxu othopa ibopananëjumata,
nexata nabijiana, bajara tsijamatabëcueneitsitsi
bajarapamonae Dioso pitorobilivaisi. Tsipaji
pepacuene pejamatabëëthëtovetsina apo
jumecovënëtsi bajarapalivaisi. Nexata apo
ajamatabëcuenesaë tsavanapae bajayajebi
pejumecovënëtsinexa bajarapalivaisi. Nexata itsa
tocopiapatatsi daxita petoayapëbejecuenetsi, itsa
yalivaisibatsinua Dioso pitorobilivaisi yabara,
nexata pejumecovënëtsijava bajarapalivaisi
bepijia copaba. Pevajënaeyabelia apo
jumecovënëtavanapae. ²² Pacuenia pijinia
paxu othopa xanëebacabomijavata, itsa juva,
bitso matacënënatsi xanëebotonë, bajara
tsijamatabëcueneitsitsi itsamonae Dioso
pitorobilivaisi. Jumetane picani bajarapamonae

Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuajëa piabejjava juva yabara pelivaisi

²⁴ Dioso apo pejumecovënëtsivi, pamonae najinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaëtoxanetojavabelia. Jesús jumaitsi mapacueniaje:

—Mara pacuene jëpaje Dioso pijajivi pevet-sijavaje. Pabi pexainaenë, ëpexaniaviriatrigoxu

uba pijapabita. ²⁵ Itsiata baitsi jane daxitajivi pemajitsijavata meravī, pabi pexainaenē pijavajabitsaenē tojunuatsi pijapabita. Nexata toubatsi trigo tuatuajēja pibisiaviriajava, betrigobotonē pecataejava. Bajaraxuacujinae vemaxēpona baja. ²⁶ Nexata trigoxu juva. Vitsaba. Itsa baja trigobotonē namatonota, nexata matapania bajarajota nayapētane pibisiaviriajava yajava penamatonotsijava. ²⁷ Nexata pabi pexainaenē pijajivi pata petsipaebinexatsi. Pabixainaenē pijajivi jumaitsi: “Nijapabita ubame ēpexaniaviriatrigoxu. ¿De tsaeta pacuenia pitsapa pibisiaviriaxu pibisiajava peyajavajuvinexa trigojava?” jai pabixainaenē pijajivi. ²⁸ Nexata pabixainaenē jumaitsi pijajivijavabelia: “Tajavajabitsaenē raeta bajaraxua uba,” jai. Nexata pabixainaenē pijajivi jumaitsi: “¿Jitsipame tsaja bajaraxua pataxunaejava?” jai. ²⁹ Itsiata baitsi jane pabixainaenē jumaitsi pijajivijavabelia: “Jume. Tsipaji panexunaejavata payajavaxunaejitsipame trigobotonē. ³⁰ Copatsianatsi abaxē penacuaitsinexa. Nexata penotsimatacabi itorobianajē tanetonotsivi copiaya pecaetuatsinexa piabejejava. Pepacunuanē exanaena. Bajaraxuacujinae bajaraxua tajuitsiana. Bajaraxuacujinae ētrigoxu netonotsiana taetabiabibota tanetoetsinexa,” jai pabixainaenē pijajivijavabelia, jai Jesús jivi ayaibitsaētoxanetojavabelia.

*Pacuenia mostazaxutoyo pejuvicujinae,
mostazanae bepīia vitsaba yabara pelivaisi
(Mr 4.30-32; Lc 13.18-19)*

³¹ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita. ³² Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana bajaraponaemaxërananëjava. Bajara pijinia itsane jivi ata. Bepijia ayaibitsaëto Dioso pijajivi naexanaena, jai Jesús jivi ayaibitsaëtoxanetojavabelia.

*Pacuenia pan pexanaematabënexa, levaduravënëjava fufunaeyaexana yabara pelivaisi
(Lc 13.20-21)*

³³ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata

levaduravënëjáva yacaējēpa daxitamatabējáva. Nexata levaduravënëjáva fufunaeyaexana daxita panmatabēnexa. Bajara pijinia itsi Dioso pijajivi pevetsijáva. Yacaējēpa daxitanacuanējáva Dioso pijajivi pevetsicuene, jai Jesús jivi ayaibitsaēttoxanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianē tsipaebapona ēcomparacióncuenia. ³⁵ Bजारapacuenia Jesús jivi livaisianē itsa tsipaebapona ēcomparacióncuenia, tocopiapatatsi jane baja pacuenia Diosojumepaebine profetanē bajayata tajjēvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanē peyaquinaebaxutota jumaitsi mapacueniaje:

Jivi itsa tsipaebajē, livaisi tsipaebianajē comparacióncuenia. Tsipaebianajē pitsicuene Dioso nacua pexanaejavaveliacujinae itsajivi ata abaxē apo yapētae, jai tajjēvelia bajayata profetanē peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapētaeyaexana pajamatabēcuenie xaina palivaisi tsipaeba trigobotonē tuatuajēa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëtoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pija-jivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtoxanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë.

⁴⁰ Nexata pacuenia piabejjava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuae peverevereceaematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamonaë pibisiacuene pexanabiabivi. Pamonaë ata itsamonaejavabelia pibisiacuene

exanaeyaexana, bajarapamonae ata taevetsinacua netovecuajutsiana tajaángelevi. ⁴² Bajarapamonae xuabianatsi infiernojavabelia. Bajarajota nuena. Navonosiniana bitso penavix-aetaexae. ⁴³ Pamonae jumecovënëtsiajinavanapa Dioso pitorobicueniatsi, bajarapamonae perabëñaitayotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabëñaitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

⁴⁴ Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexainaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanua, xuanë bajaraponë bajarapaira yacomuata, bajara pijinia itsi Dioso pijajivi pevet-sijava. Bitso xanepana. Bitso namatamotanua, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniaviriajavanë juya pecanajetaponaenexa. ⁴⁶ Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexinaejavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pija-jivijavabelia:

—Djuuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejume-covënëtsivitsi pexuabinexa infernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta.

⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi

saicaya tsatsianatsi pecapanepaenexatsi.
⁵⁰ Nexata pibisiacuene pexanaevi xuabianatsi
 infiernojavabelia. Bajarajota nuena.
 Navonosiniana bitso penavixaetaexae, jai Jesús
 pijajivijavabelia.

*Bitso penamatamotsijavanë, pejanajavanë, pe-
 rujujavanë ata, yabara pelivaisi*

⁵¹ Jesús yanijoba pijajivijavabelia.

—¿Panejumeyapëtaneme tsabaja daxita xua
 yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judíovi pecujarubinë ata, itsa
 nejumecovënëta, bajaraponë ata tajajivitonë
 tsane. Nexata pacuenia bo pexainaenë pi-
 jabovecua jutapona bitso penamatamotsijavanë,
 pejanajavanë, perujujavanë ata, bajara pijinia
 jamatabëcueneitsi tsane ponë nejumecovënëtsiana,
 judíovi pecujarubinë ata. Tsipaji bajaraponë
 yapëtaena pexanalivaisianë jivijavabelia
 petsipaebinexa. Bajaraponë yapëtaena xanë
 talivaisianë, pejanalivaisianë, perujulivaisianë
 ata, jai Jesús pijajivijavabelia.

*Pacuenia Jesús naviata pijanacuayabelia,
 Nazaret tomarabelia, yabara pelivaisi*

(Mr 6.1-6; Lc 4.16-30)

⁵³ Jesús baja penajumeveretsicujinae
 jivijavabelia livaisianë petsipaebijava
 comparacióncuenia, pona baja icatsia
 itsajavabelia. ⁵⁴ Jesús baja naviata pevitsabi-
 nacuayabelia. Nexata Jesús pevitsabinacuata

taxuxuaba livaisi petsipaebijava judíovi penacaetuatabibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjëpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënënë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatamarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatamarata bitso apo tsitaexanae.

14

*Pacuenia Juanpijinë jivibautisabinëmi beyaxuabatsi yabara pelivaisi
(Mr 6.14-29; Lc 9.7-9)*

¹ Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pini-jicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ⁴ Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cujunava jivi. Daxitajivi Juanpijinë yapëtanetsi Diosojumepaebinëcuene. ⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejionëyo, pijava

pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëitajitsipa peyavajibijava pejionëyo. ⁷ Nexata Herodes najumecapanepaeya pexaniajaijumeta jumaitsi pejionëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejionëyo itsa jumaitsi, Herodes bejamatabëjiobi tsanajetsireca. Herodes nexata acuenebi: “Jume,” pejajava. Tsipaji baja najumecapanepaeya jumaitsi pejionëyojavabelia pexaniajaijumeta daxita Herodes pejunatsivi pitabarata. Nexata Herodes jejai.

¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë.

¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinexa Juanpijinë pebeyaxuabijavatsi.

Pacuenia Jesús pexaejava rajuta cinco mil ponëbeje yabara pelivaisi

(Mr 6.30-44; Lc 9.10-17; Jn 6.1-14)

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoxaneto yapëtane itsabelia Jesús pona. Nexata pijatomaranë vecuapona. Matatsënëa najetarubena pepëjaisivitsi Jesús. ¹⁴ Itsa Jesús nonotajuna jeravecua, tane jivibitsaëtoxaneto. Nexata Jesús itaxutobejiobiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi kujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberena je, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa be-naëcotsia. Jumaitsi Diosojavabelia:

—Pexaniacuene panetoexaname. Paneraju-tame pataxaejava, jai Jesús Diosojavabelia.

Bjaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia.

²⁰ Daxita xaniavaetsia nabane. Bjaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë.

²¹ Pamona pexaejava xane, ayaiBITSaëtoXaneto. Cinco mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi.

Pacuenia Jesús mene itaboxoya najetaruca yabara pelivaisi

(Mr 6.45-52; Jn 6.16-21)

²² Jesús jivi ayaiBITSaëtoXaneto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota.

²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia.

²⁴ Bjarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bjaraxuacujinae bajayacunua, ajena matabijitsia, Jesús

pijajivi pecovëvelia imoxoyotanajetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya penajetarucaejava, nabenajaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia.

³⁰ Itsiata baitsi jane Pedro itsa tane jovibo pi-asaëjava, bitso cjunavataba. Nexata bubunana-jereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeeabi-ataneme? jai Jesús.

³² Nexata baja Jesúsbeje Pedrobeje jera ënëabelia itsa nonoliabeje, joviboxanetomi baja ajibi tsaxu-abi. ³³ Nexata daxita jerata peponaevi pemataba-cabëta tonubena Jesús pitabarata. Jumaitsi bajaranamonaë:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi

(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi itsa yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopat-sianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema tsaponae piavitanejavavecua.

15

Pacuenia Jesús tsipaeba xua jivi jamatabëcuenebijnatsi yabara pelivaisi

(Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesúsjavabelia:

² —Jesús, nijajivi naneconita Diosojavabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, xane anijatone napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta

penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajara-pajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane

paxamë jivi pamuxubijiapeneta biabame peyaiyataeyaniva paxajivi, penajivi ata. Paxamë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaeyava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata

Dioso pejumaitsi jume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi

paneyamaxëitojorbivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsi java paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejjitsipaena saya pijumeta. Itsiata pepo tanejjitsipaejamatabëcuene nevecuatajë tsane. ⁹ Saya baitsi bajarapamonae pijajumaitsita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane,

jai tajëvelia Isaías pijinë
peyaquinaelivaisita Dioso pejumaitsijava
paxamë yabara, jai Jesús fariseovijavabelia,
judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia
patanejumeyapëtaenexamë patacatsipaebilivaisi.

¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Dioso javabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabëcuenebijianatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajara pacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepítatsëcënaevi. Nexata

bepematacaponaevi pitatsēcēnaevi pijinia. Pitatsēcēnaenē itsa matacaponaejitsipa itsanē pijinia pitatsēcēnaenē, nexata najuajopaejitsiparecabeje mēthēxanetojavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athēbētatsia peecaenē, verebiabianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenē, paneyapētaeyaexanare pajamatabēcuene xaina palivaisi tsipaebame jivijavabelia. Palivaisi baitsi jumaitsimē: “Xua jivi xane pecuibota, apo jamatabēcuenebijianaetsi,” jamē, jai Pedro Jesúsjavabelia.

¹⁶ Nexata Jesús jumaitsi:

—¿Paxamē ata tsarovia abaxē apo panejumeyapētaemē? ¹⁷ Daxitacuene xua jivi xane pecuibovojotota, junua pecotsorotuabereca. Bajaraxuacujinae vecuapitsapatsi. ¹⁸ Baitsi rajane xua jivi pecuibuatsina pitsapa pecuaicuaijainexa pacuenia najamatabēxaina pejamatabēēthētovetsina, bajara jane xua jivi jamatabēcuenebijianatsi. ¹⁹ Tsipaji rabaja jivi pejamatabēēthētojavavetsina pitsapa pibisiacuene penajamatabēxainaenexa. Pitsapa jivi pebeyaxuabijamatabēcuenenexa. Pitsapa pebi pijava pevecuanamatayajitsi jamatabēcuenenexa. Pitsapa petiriavijavabelia pebi penaperabēquenetsiatāe jamatabēcuenenexa. Pitsapa penacobetoxotsijamatabēcuenenexa. Pitsapa itsamonae pexanaejava yabara najumetsēnētsiaya pepaebijamatabēcuenenexa.

Pitsapa itsamonae yabara najumetsënëtsiaya pebaracuaicuajai jamatabëcuenenexa. Daxita bajarapajamatabëcuene pitsapa jivi pejamatabëëthëtojavavetsina. ²⁰ Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Pinijijumeta bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonaë Dioso tane

beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematabacabêta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

*Pacuenia Jesús jamatejemayaexana
ayaibitsaëtoخانeto piavitanevi yabara pelivaisi*

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatatsia Jesús ecojopa. ³⁰ Nexata jivi ayaibitsaëtoخانeto pata Jesúsjavaberena. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaivi. Tocapatatsinua penabejenaevi. Tocapatatsinua ayaibitsaëtoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae.

³¹ Nexata jivi jamatabëcuenenabenajaca itsa tane pecuaicuaijajava apo pecuaicuaijaivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacuene, jumaitsi Diosjavabelia: “Diosomë, bitso ayaijamatabëcuenenëmë, paIsrael nacuapijivinë patajaDiosomë,” jai bajarapamonae.

*Pacuenia Jesús rajuta pexaejava beja-
matabëcuene cuatro mil pajivibeje yabara pelivaisi
(Mr 8.1-10)*

³² Jesús jivi ayaibitsaëtoخانeto pënjainavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje

xaina xanëjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajara-bianatsi mapajivibitsaëtoxanetoje? Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata. ³⁶ Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetojavabelia.

³⁷ Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caet-uata. Vënëba siete xuabeje bemapirecuenia pexanaejavanë. ³⁸ Pamona pexaejava xane, ayaibitsaëtoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi. ³⁹ Pexaecujinae pexaejava, Jesús

baja naviabiayaexana jivi. Nexata Jesús runareca jera ënëabereca. Pona baja Magdala nacuyabelia.

16

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi
(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonae Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuene athëbëvetsica pitorobinëcuenetsitsica.

² Nexata Jesús jumaitsi bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tshipaji itaboxo tsobia,” pajamë tsabiabi. ³ Pamatacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayaijitsia daxita matacabi. Tshipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tshipaji itarërebo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisiajamaatabëcuene xaina pamonae copaba Dioso

pejumecovënëtsijavami. Bajarapamonae picani nitoroba Dioso pesaëta pinijicue ne taexanaejava tatsitaexanaenexa taneyapëtaenexa pepacuene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicue ne taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi pet-sipaebilivaisi pejumecovënëtsianiva yabara pelivaisi

(Mr 8.14-21)

⁵ Jesús pijajivi nicabalia puca itsapanabelia. Nexata nacofënëta pamarue. Apo caponae pan. ⁶ Nexata Jesús pijajivi muxujioba pejumecovënëtsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsianiva. ⁷ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia

Jesús pejumaitsijume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaxae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcueneyapëtane bajara-pacuenia jamatabëcuenenavëxaniabiaya pejumait-sijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaxae,” panajamë? ¿Apo payapëtaemë tsipaji tanecaëjëpaejava taexanaenexa pan ita namatavenonatsi! ⁹ Paxamë abaxë apo pane-jumeyapëtaemë. ¿Apo panajamatabënapitsimë tsipaji pacuenia exanajë pamatacabi pan namatavenonatsi? Tsicobetsanajë cinco pa-panbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë? ¹⁰ ¿Apo panajamatabënapitsimënua tsipaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapa-matacabi pavënëbame peyajuvënënacopabijavanë bemapirecuenia pexanaejavanë? ¹¹ Itsa pacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsi, jai Jesús pijajivijavabelia.

12 Nexata jane baja Jesús pijajivi xaniavaet-sia jumeyapëtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi (Mr 8.27-30; Lc 9.18-21)

13 Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

14 Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënëni icatsia asaë,” jai tsabiabi itsamonae xamë yabara, jai Jesús pijajivi.

15 Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

¹⁷ Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbëtatsia peecaenë, cayapëtaeyaexana. ¹⁸ Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumeconvënëtsivi Cristocuenenë. Nexata dovathi apo jamatabëcuenematatoxenetsitsi tsane.

¹⁹ Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuapijilivaisianë. Xua itavetsianame mapanacuataje, bajaraxua Dioso ata athëbënacuatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebianiva itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

*Pacuenia Jesús tajëvelia navajunupaeba
pebeyaxuabijavanexatsi yabara pelivaisi
(Mr 8.31-9.1; Lc 9.22-27)*

²¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueni-aje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matakabita, icatsia asaënë tsane, jai Jesús tajëvelia pijajivijavabelia.

²² Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

²³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Nejamatabëcueneëjëbjitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaitsi pijajivijavabelia:

—Pajivi jitsipa tanepēnaponaejava, bajarapajivi copatsi pejitsipaecuenia penajamatabēxainabiabijavami. Exanaponaponae taitorobicuenia. Najamatabēcueneveretsinua, bejiobi-aexanaejitsia atatsi, beyaxuabijitsia atatsinua, Dioso pejumelivaisi yabara piagamatabēcuenesaē tsaponaponae nexa. Nexata jane baja xuacujinae nepēnaponae. ²⁵ Pajivi exanaponaponae penatojitsipaecuenia, apo xinae tsane matabi apo peverevereaejava. Pajivi xanē tajamatabēcueneta copata penatojitsipaecuenia pexanaejavami, bajarapajivi xinaena matabi apo peverevereaejava. ²⁶ Pajivi exanaponaponae penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xinae ata, mapanacuapijicuenete, itsiata nacuerata. Tsipaji pexinaecuene apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabianiva Diosovecua. ²⁷ Xanē, Daxitajivi Pematapijinēnē, yajavapatsianicajē taxa Dioso pijapenivenivenaetia. Yajavapatsianicajēnua tajaángelevi. Nexata matamotaponae najē caejivi canacujitsia, tanetonacuenebivi. Naneconitsiaexanaenajē pijinia pijaneconi pexinaevi. ²⁸ Xaniajanē pacuenia pacatsipaebijitsiatsi. Daxita paxamē patēpaenejevamē, xanē, Daxitajivi Pematapijinēnē, tajajivi ayaibitsaēto xaneto naexanaena. Nexata paxamēyajuvēnēvi pepuatae tsane xanē tajajivi ayaibitsaēto xaneto taevetsijava, tēpaena, jai Jesús pijajivijavabelia.

17

Pacuenia Jesús caeepatoyo perabënivenivenataba yabara pelivaisi

(Mr 9.2-13; Lc 9.28-36)

¹ Jesús petëpaejavanexa tajëvelia penava-junupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan.

² Nexata petsutojumatsia Jesús perabënivenivenareca bajarapamonae pitabarata. Pacuenia matacabipijjuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai.

³ Nexata bajarajota Jesús pijajivi tane bajayata petëpaenëmibeje, Moiséspijinëbeje Elíaspijinëbeje. Jesús barëcuaicuaijaitsi bajaraponëbeje. ⁴ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëto beje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁵ Itsa abaxë Pedro cuaicuaijai tsanucae, penaitayotsiitarërëbo mataacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Díoso pejumaitsijava: “Mara ponë taxënato, tasivanëje. Bitso sivajamatabëcuenebarëyanë. Pajumetaema bajaraponë,” pejaijavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumaitsijavatsica, irataeya othopa irata. Jesús pijajivi bitso najunaviaca. ⁷ Nexata Jesús imoxoyolia pijajivi. Jayalia. Jumaitsi pijajivijavabelia:

—Panonobapunare. Pëtsa pajunavame, jai Jesús pijajivijavabelia.

⁸ Nexata Jesús pijajivi itsa naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

¹¹ Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Xaniajai rabaja pacuenia judíovi pecujarubivi jumaitsi. ¹² Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi

apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobi-aexanaena bajarapamonae, jai Jesús pijajivijavabelia.

¹³ Nexata Jesús pijajivi jumeyapëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

Pacuenia Jesús jamatejemayaexana pejevaxinë, dovathi peyajavaponaponanënë, yabara pelivaisi (Mr 9.14-29; Lc 9.37-43)

¹⁴ Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yaiyataeya pematatabacabëta nucajunua Jesús pitabarata. Bajaraponë jumaitsi Jesúsjavabelia:

¹⁵ —Jesús, netoitaxutotsoniataema taxënatonëyo. Netodevacaiababatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia. ¹⁶ Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

¹⁷ Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë

panevecuacapitsapaenexa dovathi. ¡Panejamaatabēcuenetajavi baja rovia! Pexaniajailivaisivecua saicayacuenia panajamatabēxainame. ¿Detsa paepatojebi abaxē paxamējavata ponaponaeñajē? ¿Detsa paepatojebi abaxē paxamējavabelia ajamatabēcuenesaēnē tsaponaponae tsane patanejumecovēnētsinexamē? Panetocarenamēre pejevaxinē, jai Jesús pijajivijavabelia.

¹⁸ Nexata Jesús itaveta dovathi pejevaxinē pevecuapitsapaenexatsi. Nexata baja pejevaxinē dovathi vecuapitsapatsi. Pejevaxinē baja jamatejema.

¹⁹ Bajaraxuacujinae Jesús pijajivi barēcuaicuaijaitsi pijaepatojavata. Jesús pijajivi jumaitsi:

—Patajatuxanenē, ¿detsa xuajitsia meta paxanē apo panecaējēpae patavecuacapitsapaenexa dovathi? jai Jesús pijajivi.

²⁰ Nexata Jesús jumaitsi pijajivijavabelia:

—Apo pacacaējēpae pejevaxinē panevecuacapitsapaenexa dovathi. Tsipaji xaniavaetsia apo pajumecovēnētsimē Dioso papecayavenonaejavanexa. Xaniajanē pacuenia pacatsipaebijitsiatsi. Paxamē tsiquirijavayo ata itsa pajumecovēnētsipame Dioso papecayavenonaejavanexa, nexata pacacaējēpaejitsipa Dioso pesaēta pinijicuene paneexanaenexa. Nexata itsa pajumaitsimē tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamē, pacajumecovēnētsipa. Nexata natixitsipa. Nexata paxamē paneexanaenexa itsacuenejavayo ata, apo pacatsitaayapēbeje tsipae itsa

pepacuene xaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaaponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi
(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia.

²³ Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebapona-aejava petëpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

²⁵ Pedro nexata jumaitsi:

—Jājã. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaevecsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevecsivi pijajivi yanijobabiaba impuestomatamo? ¿Nacuaevecsivi tsaja pijamonaejavabelia? Itsa jume, ¿saicayavijavabelia tsaja, nacuaevecsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevecsivi raja pijajivi impuestomatamo yanijobabiaba saicayavijavabelia, nacuaevecsivi pevetsinacuata pejinavanapaevijavabelia. Apo yanijobabiabi nacuaevecsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevecsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevetsivijavabelia taxa Dioso pijatemploboxae.

²⁷ Itsiata baitsi jane xamë matamotsianame itsajivi ata vajanacabaraanaepanaeyanivabeje.

Liamëre pucaxanetojavabelia. Ëjëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënënë panevecuaayaijamatabëcuenenë?” jai Jesúsjavabelia yabara pelivaisi (Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënënë bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuat-uajëta nuteta pejevaxinëyo. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë itsa apo panajamatabëcuenepënëyorotsimë tsane perujamatabëcuenevecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso

pijanacuayabetsia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije. ⁵ Pajivi copiapita tanejumečovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumečovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumečovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumečovënëtsiviyajuvënëvi. ⁷ ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene

tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ 'Bjaraxuata panecobeta, panetaxuta ata, pibisiacuene itsa paexaname, panacobecacure. Panataxuacure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo peverevereaeisotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi (Lc 15.3-7)

¹⁰ Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa

peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjëre mapacueneye. Pebi xinaejetsipa cien ponëbeje oveja. Nexata itsa toya-juvënë naxuabijitsipatsi caenë, oveja pexainaenë puenetsipa noventa y nueve ponëbeje oveja. Bjaraxuacujinae jaitsipa petonaxuabinëtsi.

¹³ Xaniajanë pacuenia pacatsipaebijitsiatsi. Bjaraponë itsa caxitajarabijitsipa pijaoveja, petonaxuabinëmitsi, bitso barëyataejetsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. ¹⁴ Bajara pijinia

pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

*Pacuenia Dioso pejumecovënëtsijivi
bebarajamatabëcuenexanepana, itsacueniabi atatsi
itsajivi, yabara pelivaisi*

(Lc 17.3)

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuenepapatoexanaejava, itsa pavënëlivaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje,

panabarajamatabëcuene xanepanaenamebeje.

¹⁶ Xaniavaetsia itsa apo pacabarëcuaicuajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujiobinexatsi. Nexata bajaraponëbeje pacajumetaena xaniavaetsia panebarëcuaicuajajava pibisiacuene papecatoexanaenëjavabelia. Bajarapacuenia

itsa paexanaename, nexata pacuenia Dioso pejumelivaisibaxutota jumaitsi, paexanaename.

¹⁷ Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujiobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bajaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanēmēbeje ita panajamatabēcuenejēpamebeje xua pavajētsijitsiamēbeje Diosojavabelia, nexata taxa, athēbētatsia peecaenē, pacajumecovēnētsianabeje xua pavajētamebeje. ²⁰ Tsipaji itsajota anijajivibeje, acueyabi ata, nacaetuata, tanejumecovēnētsivi, bajarajota xanē bajarapamonae yajavaecaenajē, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenē, panetsipaebame rabaja. Panejumaitsimē mapacueniaje: “Itsajivi Dioso pejumecovēnētsijivi pibisiacuene ita pacaexanaena, pajamatabēcaevianame. Barajamatabēcuenexanepanaeya pataename. Itsa pavēnēlivaisitaename pibisiacuene papecatoexanaejava, xaniavaetsia payanijobianame caenējavata. Nexata xaniavaetsia ita panabarēcuaicuaijamēbeje, panabarajamatabēcuene xanepanaenamebeje,” panejamē. ¿Detsa xuabeje pibisiacuene nexanae ata, pibisiacuene netoexanae atanua, jamatabēcaevianajē barajamatabēcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinē. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabēcaevare barajamatabēcuenexanepanaeya panetaenexa,

baitsi cuatrocientos noventa xuabeje ata, jai Jesús Pedrojavabelia.

Ponë apo jitsipae pebarajamatabëcuenexanepanaenexa itsanëjavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaevetsinë pijajivijavabelia baexana. Nacuaevetsinë jitsipa piamoneyabivitsi pematamotsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarëparenatsi ponë bitso ayajava amoneyabatsi, baitsi millones de pesos piamoneyabinëtsi. ²⁵ Nexata bajaraponë apo xainae pematamotsijavanexatsi. Nexata nacuaevetsinë itoroba pijajivi. Jumaitsi: “Mara ponë bitso ayajava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamatamo,” jai nacuaevetsinë pijajivijavabelia. ²⁶ Nexata ponë amoneyaba, nacuaevetsinë pitabarata pematabacabëta nucajunua. Pinijicuenia vajëta nacuaevetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevetsinë itaxutotsoniatane

piamoneyabinëtsi. Nexata nacuaevetsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevetsinë piamoneyabinëtsijavabelia. Bajaraxuacujinae copata baja penaviatsinexa. ²⁸Nexata bajaraponë penaviatsinexa, ajena pitsapalia nacuaevetsinë pijabovëcua, caxitajarabaxuaba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai. ²⁹Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. ³⁰Itsiata baitsi jane bajaraponë piamoneyabinëtsi apo itaxutotsoniatae. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹Nexata nacuaevetsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamonae bitso najamatabëxaina. Nexata nacuaevetsinë pijajivi ponalia petsipaebinexa bajaraxua pijatuxanenëjavabelia. ³²Nexata nacuaevetsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi, nacuaevetsinë jumaitsi

bajaraponëjavabelia: “Niajamatabëcuenebejenë baja rovia. Catoiquinatsi rabaja picani taneamoneyabijavamë. Tsipaji pinijicuenia nevajëtame. ³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaevevtsinë. ³⁴ Nexata nacuaevevtsinë bitso baraanaepana millones de pesos piamoneyabinëtsijavabelia. Nexata nacuaevevtsinë jumaitsi pijajivijavabelia: “Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaevevtsinë, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbëtatsia peecaenë, pacaexanaena, itsa apo pajamatabëcaevimë tsane panebarajamatabëcuene xanepanaenexa pamonae pacaitsacueniaba, jai Jesús pijajivijavabelia.

19

Pacuenia Jesús jivi livaisi tsipaeba penacojiobinë pijava pexuabiyanima yabara pelivaisi

(Mr 10.1-12; Lc 16.18)

¹ Jesús pijajivi pemuxujiobicujinae pebarajamatabëcuene xanepanaenexa itsamonae itsacueniabi atatsi, Jesús baja pona Galilea nacuavecua. Jesús nexata pata Judea nacuyabelia, Jordánmene itsapanabelia. ² Jivi ayaibitsaëtoxaneto

pēnaponatsi. Bajarajotalia Jesús jamatejemayaexana piavitanevi.

³ Nexata fariseovi Jesús imoxoyorenatsi. Jamatabēcuenejēbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa itsacuenejavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimē tsipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota. ⁶ Nexata Dioso apo tae beanijajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinē copata penacojobinē petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabēcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejevaveliacujinae, apo tocopatsi picani bajarapacuenia pexanaenexa.

9 Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë ita nacojioba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

10 Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itax-utojema pijava pexuabinexa, nexata meta baja apo benacojiobi, jai Jesús pijajivi.

11 Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamona Dioso jamatabëcueneyavenonatsi. ¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi

(Mr 10.13-16; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pecobeta pejayatapon-aenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamona jitsipa pejonejava Dioso pijanacuayabetsia, bajara pijinia pacuenia jumeaebinejeva, xaniavaetsia bejume-covënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

Pacuenia pevëjëato, bitso pexainanë, cuaicuai-jai Jesúsjavabelia yabara pelivaisi

(Mr 10.17-31; Lc 18.18-30)

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa matababi apo pevereverecejave? jai pevëjëato.

17 Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matabacabi apo pevereverecaejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

18 Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. 19 Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

20 Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

21 Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaename

bitso nexainaejava Dioso pijanacuatatsia. Bajaraxuacujinae nepënäponaename, jai Jesús pevejëatojavabelia.

²² Nexata pevejëato itsa jumetane bajarapacuenia Jesús pejumäitsijava, najamatabëxainäeya baja vecuapona Jesús. Tsipaji pevejëato daxitacuene bitso pexainäenë. Nexata pevejëato apo jamatabëjumecovënëtsi palivaisi Jesús tsipaeba.

²³ Nexata pevejëato pecovëta Jesús jumäitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainäenë, tsia yapëbejetsi bitso penajamatabëcuenecopatsinexa Diosojavabelia pecapanepäenexatsi Dioso pijanacuayabetsia. ²⁴ Icätsia matavëjëa pacajumäitsitsi. Pacuenia camello acuenëbi pejonejava palutaetotaxutovojotualia, bajara pijinia pacuenia bitso pexainäenë acuenëbi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi itsa jumetane bajara pacuenia Jesús pejumäitsijava, bitso jamatabëcuenenäbenajaca. Jesús pijajivi jumäitsi Jesúsjavabelia:

—¿Dëtsa nexata pitsivi panepäena Diosojavabelia bitso pexainäevi äta itsa apo panepäe tsane Diosojavabelia? jai.

²⁶ Jesús äsäëya näëcota pijajivijavabelia. Jumäitsi pijajivijavabelia:

—Jivi raja apo cäëjëpäetsi pijacuata penacapanepäenexa Diosojavabelia. Cäenë

Dioso caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatacabi paxamë ata, doce paponëmëbeje patanepënajinavanapaevimë, paenaename, pacaenëmë canacujitsia, panija-tronota vajanajuaevetsinexa xua evetsianajë. Nexata paxamë paenaename jueznëcuenia pananeconitsiaexanaenexa pijaneconi pexainaevi. Pananeconitsiaexanaename Israelpijinëmi pexi, doce ponëmibeje, pemomoxi.

²⁹ Daxita pamonae tajamatabëcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayaijava bitso pepuenetsijavanëmi matatoxenetsia. Caejavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabi apo pevereverecaejava. ³⁰ Pamonae aeconoxae mapamatacabitaje ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi

tanetsi, bajarapamonae itsamatacabi Dioso ayaijamatabëcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi

¹ Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatatsia, jëpa mapalivaisije. Pabixaneto pexainaenë ponapona. Ajena matacabi tsarucaponae, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi. ³ Bajaraxuacujinae

juameto baja tajë itsa rucaina, a las nueve, naropota icatsia. Taenuba tomara tuatuajëta pebijivi, saya jema pejinavanapaevi.

⁴ Nexata jumaitsi bajarapamonaejavabelia: “Paxamë ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenë. ⁵ Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabëcuene a las tres, junata icatsia

itsamonaē. Bajarapamonae ata ponalia petonacuenebinexatsi. ⁶ Bajaraxuacujinae, caniviyo, bejamatabēcuene a las cinco, pabixainaenē icatsia pona tomara tuatuajēareca. Caxitajarabaxuaba icatsia pebijivi, saya jema pejinavanapaevi. Nexata pabixainaenē jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamē?” jai. ⁷ Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenē jumaitsi: “Paxamē ata paponaremelia tajapabiabelia patanetonacuenebinexamē. Pacamatamotsianatsi raja xaniavaetsia,” jai pabixainaenē. Nexata bajarapamonae jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenē jumaitsi pijajivitonējavabelia: “Junare baja tanetonacuenebivi. Matamobare baja. Copiaya matamobare pamonaē pepacotocaevi pejonevi. Pamonaē pepacopiaya pejonevi cotocaevi matamobianame,” jai pabixainaenē pijajivitonējavabelia. ⁹ Nexata pamonaē pepacotocaevi junua a las cinco penacuenebinexa, parena pematamobinexatsi. Nexata caenē canacujitsia matamobatsi caedenario. ¹⁰ Nexata daxita pamonaē bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabējumaitsi: “Caedenario meta pematatsēnēa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,”

jamatabëjai bajarapamonae. Itsiata baitsi jane bajarapamonae ata, caenë canacujitsia, matamobatsi caedenario tsaponae. ¹¹ Nexata bajarapamonae penacuenebimatamo baja itsa nota, baraanaepana pabixainaenëjavabelia. ¹² Jumaitsi bajarapamonae: “Mapamonae cotocaevi pepatsivi, nacueneba saya caehora. Paxanë baja rovia ayaicuenia panacuenebajë. Icotia daxitamatacabi panetsajava. Itsiata mapamonae matamobame pacuenia panematamobame,” jai bajarapamonae. ¹³ Itsiata baitsi jane pabixainaenë jumaitsi bajara pamonae yajuvënënëjavabelia: “Itsacuenejavayo ata pibisiacuene apo pacaexanaetsi. Patacajunatsijavata patanetonacuenebinexamë, caedenario pacatsipaebatsi patacamata-motsinexa patanetonacuenebimatamomë. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonëjavabelia. Pamonae cotocaevi junua tanetonacuenebinexa, bajarapamonae ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. ¹⁵ Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonae ayaijava tarajutsixae? jai pabixainaenë petonacuenebivitsi yajuvënënëjavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamonae mapanacuata ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonae pijinia mapanacuata

beveliajamatabëcuenevi tanetsi, bajarapamonae itsamatacabi Dioso ayaijamatabëcuenevi exanaenatsi. Bajarapacuenia Dioso exanaena tsipaji picani jivi ayaibitsaëtoxaneto Dioso junata. Itsiata bajarapamonaeyajuvënëvi, caejiviyobeje saya, Dioso jumecovënëta, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaevecua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebeyaxuabinexa.

¹⁹ Bajaraxuacujinae icatsia necanajetsiana itsanacuaverena pepatsivi pecobeyabelia. Bajarapamonae necanecaponaena. Nejumatitibabena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinae, acueyabi matabita, icatsia asaënë tsane, jai Jesús

pijajivijavabelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacue ne petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacue ne petoexanaenexatsi. ²¹ Nexata Jesús jumaitsi bajarapovajavabelia:

—¿Detsa pitsicue ne jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacue ne evetsianame, tocopatsianame taxënatobeje nemuxuneneta penaecaenexabeje panenajuaevetsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaëjöpabeje tsaja panenacaevetsinexabeje papecabejiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacaëjöpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsiibeje:

—Jājā, panecaējēpabeje cajena, jaibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamēbeje rabaja. Paxamēbeje pacabejiobiaexanaenabeje pacuenia xanē nebejiobiaexanaena. Pacabeyaxuabianabejenua pacuenia xanē nebeyaxuabiana. Itsiata baitsi jane xua panevajētamebeje panenaecaenexabeje, itsanē tacujuanenia, itsanē tatsavenononia, bajaraxua Dioso apo netocopatsi patacatocopatsinexabeje. Tsipaji raja taxa Dioso ēpitapetsivinexa abaxē bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponēbeje Jesús pijajivi vēnētane pepēya bajaraxua Santiagobeje Juanbeje Jesúsjavabelia pevajēcaejavabeje. Nexata bajarapamonae jamatabēcuenēbaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonae jinavanapa pevetsinacuanējava. Nexata bajarapanacuanē pevetsivi ayaijamatabēcuenēvi nataeyabiaba. Xua jamatabēitoroba pevetsinacuanējava pejinavanapaevi petoexanaenexatsi, ajumesaēya itorobabiaba petoexanaenexatsi. ²⁶ Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuenenē penaexanaenexa daxita

paxamēvecua, bajaraponē daxita paxamē bepanijajivitonēcuenia bepacayavenonabiaba. ²⁷ Ponē paxamēyajuvēnēnē jitsipa penaex-anaenexa papecanamatacaitorobinēnexa, bajaraponē daxita paxamē bepanijajivitonēcuenia bepacayavenonabiaba. ²⁸ Tsipaji rabaja xanē ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenexa jivi ayaibitsaēto xaneto pibisiacuene pexanaeneconimi taneconimata-motsinexa, jai Jesús pijajivijavabelia.

Pacuenia Jesús itaxutoxanepanaeyaexana bitso pitaxutotsēcēnaenēbeje, apo petaenēbeje, yabara pelivaisi

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomar-avecua. Nexata jivi ayaibitsaēto pēnaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsēcēnaenēbeje, apo petaenēbeje. Nexata bajaraponēbeje itsa jumetanebeje bajarapanamutua imoxoyo Jesús penajetarucaejava, vavajaibeje tsecae.

—¡Jesús, Davidpijinē pemomomē, paneitaxutotsoniataemabeje! jaibeje tsecae pitaxutotsēcēnaenēbeje.

³¹ Jivi picani jumeitavetatsibeje pemoyanexabeje tsecae. Itsiata biji bitsoyo orijibia vavajaibeje tsecae.

—¡Jesús, Davidpijinē pemomomē, paneitaxutotsoniataemabeje! jaibeje tsecae Jesúsjavabelia.

³² Nexata Jesús muxunanucojopa. Junata pitaxutotsēcēnaenēbeje. Jesús jumaitsi bajaraponēbejejavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponēbeje jumaitsibeje Jesúsjavabelia:

—Jesús, pajitsipajēbeje pataitaxutoxanepanaejavabeje, jaibeje tsecae.

³⁴ Nexata Jesús itaxutotsoniatane bajaraponēbeje. Jesús itaxutojayata bajaraponēbeje. Bajarajota caecuena bajaraponēbeje itaxutoxanepanabeje baja. Nexata bajaraponēbeje Jesús pepēta naponabeje.

21

Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barēpata baja Betfagé tomarata. Patsutojumata nubena olivonaenē, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonēbejejavabelia mapacueniaje:

² —Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataenutsianamebeje burro pecētanutsinētsi, pexēnatonēyo yajava. Paisinaenamebeje bajarapaburrobeje. Payamaēyacarenamēbeje tsane. ³ “¿Detsa xuajitsia burrobeje paisinamebeje?” itsa pacajaibeje tsane itsajivi,

nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Bajarapacuenia Jesús itsa jumaitsi, tocopia-patatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinaelivaisita jumaitsi mapacueniaje:

⁵ Pajumaitsimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucajava. Beveliajamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia,

jai bajayata tajëvelia profetanëmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonëbeje liabeje. Jumecovënëtabeje pacuenia Jesús itorobatsibeje.

⁷ Yamaëya carenabeje burro, pexënatonëyo yajava. Nexata bajarapaburrobeje Jesús pijajivi tsijumajeba pijacama,” pajamë tsane Jerusalén tomarapijivijavabelia,

jai bajayata tajëvelia profetanëmi peyaisajumavelia penaxatabijavanë. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaétoxaneto, pijacamisajumavelia penaxatabijavanë, Jesús

pevajënaeya namutua yerequejebapona. Itsa-
monae naemaxërananë, pebaxu yajava, ucubaba.
Nexata namutua Jesús tsivajënaeitabëtsiaya
jebaponatsi yaiyataeya pecopiapitsinexatsi.
⁹ Jesús penajetarucæjavata jivi ayaibitsaëtoxaneto
Jesús pevajënaeya namataxainaeya najetarubena.
Itsabitsaëtoxaneto Jesús pecovëya cotocævana-
jetarubena. Daxita bajarapamonae vavajai
tsanajetarubenae. Jumaitsi tsanajetarubenae:

—¡Dioso yavenonaenatsi maponëje, pepo
nacuaevetsinëmi Davidpijinë pemomo! ¡Dioso
yavenonaenatsi maponë najetarucæje nacua
pevetsinënexa Dioso pejamatabëcueneta!
Nexata vaxaitsi pexaniajamatabëcuene
rajutatsi Diosojavabelia, jai tsanajetarubenae
bajarapamonae.

¹⁰ Nexata Jesús itsa pata Jerusalén
tomarata, daxita Jerusalén tomarapijivi
jamatabëcuenenabenajaca. Nexata nayanijoba.

—¿Detsa meta maponë najetarucæje? najai ba-
jarapamonae.

¹¹ Nexata jivi jumaitsi:

—Jesús ra manajetarucæje, Diosojumepaebinë
profetanë. Galilea nacuata pecaetomara,
Nazaret tomarapijinë, jai bajarapamonae.

*Pacuenia Jesús Jerusalén tomarata templobove-
cua pitsapaeyaexana pecanajetabiabivi, pecomua-
cabiabivinua, yabara pelivaisi*

(Mr 11.15-19; Lc 19.45-48; Jn 2.13-22)

¹² Jesús itsa pata Jerusalén tomarata, joneya
temploboyalia. Nexata templobota Jesús tane

pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinë profetanë. Galilea nacuata peecaetomara, Nazaret tom bajarapamonae Jesús pitsapaeyaexana templobovecua. Palata pecambiabiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

¹³ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsëcënaevi, pejayujayunaevinua. Nexata Jesús bajarapamonae xanepanaeyaexana.

¹⁵ Templobota nubena sacerdotevi. Nubena judíovi pecujarubivinua. Bajarapamonae taenubena Jesús pitaxutoxanepanaeyaexanaejava pitaxutotsëcënaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevavajaijavata pejumaitsijava Jesús yabara: “¡Dioso yavenonaenatsi maponëje, pepo nacuaeavetsinëmi Davidpijinë pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

16 Nexata bajarapamonae jumaitsi Jesúsjavabelia:

—¿Tsipaji apo jumetaemë mapapejevaxi xamë yabara pejumaitsaponaejavaje? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jājã. Jumetaniji picani. Itsiata apo jumeitavetsinë. ¿Paxamë tsipaji Dioso pejumelivaisibaxuto apo palebimë paneyapëtaenexa pacuenia tajëvelia jumaitsi xanë yabara bajarapapejevaxi pevavajaijavanexa? Dioso pejumaitsijava xanëjavaberena, tajëvelia Dioso pejumelivaisibaxutota jumaitsi mapacueniaje:

Pejevaxi, mitoapaenacuetoxi ata,
 naxëanaeyaexanaename penaxëanaejavata
 xamëjavaberena pecajumaitsinexa:
 “Ayaijamatabëcuenenëmë bitso,”
 pecajainexa,

jai Dioso pejumelivaisibaxutota xanëjavaberena Dioso pejumaitsijava. Bajaraxuata mapapejevaxije jumaitsi bajarapacuenia, jai Jesús sacerdotevijavabelia, judíovi pecujarubivijavabelia ata.

17 Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higueranae piacuaijibixae yabara pelivaisi

(Mr 11.12-14, 20-26)

18 Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia

Jerusalén tomarabelia. Jesús nexata namutua penajetarucaejavata, piajani. ¹⁹ Jesús nexata taenuta higueranae namuto muxuneneta. Nexata Jesús imoxoyolia higueranae, pecuai itsa xaina, pexaenexa. Pecuai itsiata apo xinae higueranae. Ëpëbaxu saya tsanuca. Bajaraxuata nexata Jesús jumaitsi higueranaejavabelia:

—¡Xamë baja apo nacuaitsimë tsane! jai Jesús.

Bajarapacuenia Jesús pejumaitsijavata, bepíjia higueranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepíjia tēpanajerecaje? najai.

²¹ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, nexata paxamë ata pacacajëpaejitsipa paneexanaenexa pacuenia exanajë mapahigueranaejavabeliaje. Itsiata ëbajarapacuenia paneexanaenexa, apo pacacajëpae tsipae. Pematatsënëa itsacueneyavanëna paneexanaenexa, pacacajëpaejitsipa. Nexata itsa pajumaitsimë tsipae mapatsutojavabelia ataje: “Natixire majotavecuaaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia pacajumecovënëtsipa. ²² Nexata daxitacuenia xua pavajëtsianame Diosojavabelia, pasivajamatabëjumaitsimë tsane mapacueniaje: “Xua

vajëtajë Diosojavabelia, pepacuene Dioso nejumecovënëtsiana,” pasivajamatabëjamë tsane. Nexata xua pavajëtsianame Diosojavabelia, Dioso pacajumecovënëtsiana, jai Jesús pijajivijavabelia.

Pacuenia Jesús caëjëpatsi daxitacuene pexanaenexa yabara pelivaisi
(Mr 11.27-33; Lc 20.1-8)

²³ Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatem-plobopanabovecuaje? jai bajarapamonae Jesúsjavabelia.

²⁴ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuene. ²⁵ ¿Jipatsa jane pejamatabëcueneta Juanpijinë jivi bautisabapon-pona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata ëpamonae nabarëcuaicuajiai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë

pepaebilivaisi?” nacajai tsipae. ²⁶ “Jivi raja saya pejamatabēcueneta Juanpijinē jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinē yabara daxitajivi sivajamatabējumaitsi: “Juanpijinē raja pepacuene Diosojumepaebinēmi,” sivajamatabējai, najai sacerdotevi, judíovi pijaancianovi yajava.

²⁷ Nexata saya bajarapamonae jumaitsi Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanē ata apo pacatsipaebi tsanetsi ponē nitoroba taexanaenexa bajarapacuenē, jai Jesús.

Pacuenia Jesús jivi livaisi tsipaeba anijanēbeje pexēnatobeje pexainaenē pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaējētsianame palivaisi aeconoxae pacatsipaebijitsiatsi. Pebi xaina anijanēbeje pexēnatobeje. Nexata pexēnatojavabelia jumaitsi: “Taxēnato, ajena netonacuenebianame tajauvacabota,” jai pexēnatojavabelia.

²⁹ Nexata bajaraponē paxajavabelia jumaitsi: “¡Jumel! ¡Apo jitsipaenē tanacuenebijava! jai. Itsiata xuacujinae bajaraponē icatsia najamatabēxaina. Nexata jamatabējumaitsi: “Xanē baja rovia pibisiajamatabēcuenē

najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë.³⁰ Bajaraxuacujinae pexënatobeje pexainaenë pona icatsia itsanë pexënatojavabelia. Bajaraponëjavabelia ata jumaitsi: “Taxënato, ajena netonacuenebianame tajauvabacabota,” jai pexënatojavabelia. Nexata jejai itajara pexënato. Itsiata apo pona.³¹ ¿Detsa ponë bajaraponëbejeyajuvënënë paxa jumecovënëta? jai Jesús bajarapamonaejavabelia.

Nexata bajarapamonaejumaitsi Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamonaecopabiana pibisiacuene pexanabiabijavami, pamonaenajamatabëcuene pënëyorotsiana Diosojavabelia. Impuestomatamo gobierno pejamatabëcuene petomatamoyanijobabiabivimi ata jonena Dioso pijanacuayabetsia itsa najamatabëcuene pënëyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabëcuene pënëyorota Diosojavabelia pibisiacuene pexanabiabijavamivecua. Itsiata baitsi jane paxamë apo pajonemë tsane.³² Juanpijinë jivibautisabinë patajopa Dioso pejumelivaisi papecatsipaebinexa panenajamatabëcuene pënëyorotsinexa pibisiacuene paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata

bajarapalivaisi jumecovënëta impuestomatamo gobierno pejamatabëcuene pematamoyani-jobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuenepënëyorotsimë panejumecovënëtsinexa Dioso, jai Jesús bajarapamonaejavabelia.

Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi (Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenë pijairata uba ayaiabacaboxaneto uvavënëjava. Bajaraxuacujinae pijaira matatoyorotsia, ibopanaxanetonë mataropotsia pefaratsijavata, yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetabiabecaenexa pijauvabacabo.

’Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë

itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona. ³⁴ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvabacabo pexainaenë pijajivi uvabacabo petoevetsivitsi totaicsi. Caenë bajarapamonaeyajuvënënë toconibabiatsi. Itsanë pepacuene tobeyaxuabatsi. Itsanë ibotonëta totseconatsi. ³⁶ Nexata uvabacabo pexainaenë icatsia itsabitsaëto pijajivi itorobalia. Bajara icatsia pacuenia exana uvabacabo pevetsivi.

³⁷ Nexata uvabacabo pexainaenë itoroba icatsia pexënato jane baja. Uvabacabo pexainaenë jamatabëjumaitsi: “Netoyaiyataena meta taxënato,” jamatabëjai. ³⁸ Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ³⁹ Nexata icatsia uvabacabo pexainaenë pexënato ata tovaetabatsi. Caponaliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanjoba sacerdotevijavabelia, judíovi pijaancianovi-

javabelia ata. Jesús jumaitsi:

—Uvabacabo pexainaenë itsa patsiarena, ¿de tsaeta xua exanaena uvabacabo petoevetsivitsi-javabelia? jai Jesús bajarapamonaejavabelia.

⁴¹ Nexata bajarapamonae jumaitsi Jesúsjavabelia:

—Pijauvabacabo raeta pexainaenë apo itaxutot-soniatae tsane. Nexata verebiabiana bajarapamonae pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaëjëtatsi uvabacabo pexainaenë perajutsinexatsi, jai bajarapamonae.

⁴² Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. Vajatuxanenë Dioso raja exanaena bajarapacuene. Nexata bitso nacatsita pexaniacuene tsane bajarapacuene,

jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara

jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenë icatsia itsamonae evetsiaexanaena, bajara pijinia pacuenia Dioso exanaena paxamëjavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaе xaniavaetsia jumecovënëta Dioso pitorobicueniatsi. ⁴⁴ Pamonaе apo nejumecovënëtsi Dioso pexënatocuenenë, bajarapamonaе bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonaе naneconitsiaexanaenajë, bajarapamonaе pepacuene naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaеjavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsijava, bajarapamonaе jamatabëjumai tsenae: “Vaxaitsi yabara raeta jumaitsi,” jamatabëjai tsenae bajarapamonaе. ⁴⁶ Nexata picani bajarapamonaе Jesús jamatabëvaetabatsi. Itsiata bajarapamonaе jamatabëjumaitsi: “Bajaraponë jivi tanetsi Diosojumepaebinëcuene. Nexata nacaitsacueniabijitsipa vaxaitsi itsa vaetabijitsipatsi maponëje,” jamatabëjai tsenae bajarapamonaе. Bajaraxuata Jesús apo vaetabitsi.

*Pacuenia Jesús jivi livaisi tsipaeba penacasabifi-
esta pexanaenë pelivaisicuenia yabara pelivaisi
(Lc 14.15-24)*

¹⁻² Jesús icatsia livaisi tsipaeba sacerdotevi-
javabelia, judíovi pijaancianovijavabelia ata.
Bजारapacuenia Jesús tsipaeba bajarapamonae
peyapëtaenexa pacuenia itsamatacabi itsijitsia,
pamatacabi Díoso pijajivi evetsiana. Jesús
jumaitsi mapacueniaje:

—Pepo nacuaevetsinë fiesta exana
pexënato petonacasabifiestanexatsi. ³ Nexata
nacuaevetsinë jumaitsi pijajivijavabelia:
“Pamonae baja tajëvelia junatajë, patsipaebare
baja tanetopatsinexarena fiestanexa jane
baja,” jai nacuaevetsinë pijajivijavabelia.
Pijajivi baja nexata pona petsipaebinexa.
Itsiata pejunatsivi apo jitsipae peponaejava.
Nexata nacuaevetsinë pijajivi naviabarena
petsipaebinexa pijatuxanenëjavabelia. ⁴ Nexata
nacuaevetsinë itsamonae icatsia pijajivi
itorobalia pesivaponaenexalia. Nacuaevetsinë
jumaitsi pijajivijavabelia: “Pajumaitsimë
tsane tajunatsivijavabelia: ‘Veretejeba rabaja
panexaejavanexa. Beyaexana rabaja baca
penasitsivi, becerro yajava. Daxita rabaja
veretejeba panenabaninexa. Naxanitsia. Daxita
pina paponae remelia,’ pajamë tsane tajunatsivi-
javabelia,” jai nacuaevetsinë pijajivijavabelia.
⁵ Itsiata baitsi jane bajarapamonae icatsia
sivapona atalia, nacuaevetsinë pejunatsivi apo
jejai. Pejunatsiviyajuvënënë itsanë pona pijapabi-
anëjavabelia. Itsanë pijinia pona penavijatsinexa.
⁶ Itsamonae nacuaevetsinë pijajivi taicatsi.

Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevetsinē bitso baraanaepana pejunatsivimijavabelia. Nexata nacuaevetsinē itorobalia vajabitsaēvi pebenexa pamonaē tobeyejebatsi pijajivi. Itorobanua pijatomaranēmi ata petotajuitsinexa. ⁸ Bajaraxuacujinae nacuaevetsinē icatsia pijajivijavabelia jumaitsi: “Daxitacuenē baja picani veretejebiaexanajē taxēnato penacasabifiestanexa. Itsiata baitsi jane tajunatsivimi apo netopatsirena. ⁹ Paponaremelia pinijicallexanetonējavabelia. Nexata daxita pamonaē pacaxitajarabaponaename bajarapacallexanetonējava, pajunataponaename taxēnato penacasabifiestajavaberena pepatsinexa,” jai nacuaevetsinē pijajivijavabelia. ¹⁰ Nexata nacuaevetsinē pijajivi ponalia. Najetarubena callexanetonējava. Junatapona daxita pamonaē caxitajarabapona. Junatapona piajamatabēcuenebejevi, pejamatabēcuenexanepanaēvi ata. Nexata bajarapamonaē barēpona fiesta pexanaebojavabelia. Nexata pabota fiesta exana, vënëca jivi.

¹¹ Nexata nacuaevetsinē jonena bajarapaboyarena petaenexa petopatsivitsi. Daxita pamonaē topatatsi, jumapata xua banaxataba itsa pona penacasabifiestajavabelia. Nexata nacuaevetsinē taenuta bajarajota itsanē, saicayavirijava penaxatatsinē. Apo naxatatsi xua naxataba daxita. ¹² Nexata nacuaevetsinē jumaitsi bajaraponējavabelia: “¿Detsa xuajitsia najunuame apo nenaxatatsinē pacuenia daxita naxataba

penacasabifiestajavaberena penajonevi?” jai nacuaeavetsinë. Nexata bajaraponë moya nuca. ¹³ Nexata nacuaeavetsinë jumaitsi mesa pevetsivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaeavetsinë. ¹⁴ Pacuenia fiesta pexanaenë ayaibitsaëtoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëtoxaneto junata pijajivinexa. Itsiata saya caejiviyobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarëcuaicuaijainexa. Bajarapamonae najamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaeavetsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi.

Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. ¹⁷ Panetsipaebare pacuenia najamatabëxainame mapacuene yabaraje. ¿Xanepana tsaja vajamata-motsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁸ Itsiata baitsi jane Jesús jamatabëcueneyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaiti bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame?

¹⁹ Panetsitajëre pitsipalatanëyota pamata-motabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. ²⁰ Jesús itsa tane bajarapapalatanëyo, nexata jumaiti bajarapamonaejavabelia:

—¿Jipatsa mapitabaraje, pevënënuu, ruca mapalatanëyojumataje? jai Jesús.

²¹ Nexata bajarapamonae jumaiti Jesúsjavabelia:

—Romanonacua raja pepo pevetsinë pitabara, pevënënuu, jai.

Nexata Jesús jumaiti bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneëjêbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

²⁴ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁵ Nexata jinavanapa ënacaemonae siete ponëbeje paxanëjavata. Pepo matapijinë copiaya nacojoba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami. ²⁶ Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova.

Bajara icatsia ponë ata tēpa pexi xainaenejeva bajarapovajavabelia. Bajarapacuenia tēpa daxita si ete ponēmibeje nacaemonaemi, bajarapova pepitaponaevi. Itsiata itsanë ata pexi apo xinae bajarapovajavabelia. ²⁷ Bajaraxuacujinae bajarapova ata tēpa baja. ²⁸ “Jivi raja petēpaecujinae, Dioso icatsia asaēyaexanaenatsi,” jamë. ¿Detsa nexata ponë bajarapamonaeyajuvënënë pijava tsane bajarapova bajarapamatacabi? Daxita pamonaesiete ponēmibeje nacaemonaepitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënuu pacuenia Dioso caējëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

³⁰ Pamatacabi raja petēpaevimi Dioso icatsia asaēyaexanaenatsi, apo nacojobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojobinexatsi. Bajarapamonaenacojobinejeva, jinavanapaena athëbëtatsia pacuenia ángelevi jinavanapa.

³¹ Itsa pepacuene paxamë xaniavaetsia paneyanijobame paneyapëtaenexa Dioso icatsia piásaēyaexanaejavanexatsi petēpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaitsi. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonaeyabara bajayata Dioso jumaitsi

Moiséspijinëjavabelia mapacueniaje: ³² “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bजारapacuenia Dioso pejumlahitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëtoxaneto itsa jumetane bajarapacuenia Jesús pejumlahitsijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuaijainexa. Nexata fariseovi najumejaita pacuenia yanijobijitsia Jesúsjavabelia. ³⁵ Nexata fariseoviyajuvënënë, judíovi pecujarubinë, Jesúsjavabelia jamatabëcuenejëbiaya yanijoba. Jumaiti Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

37-38 Jesús nexata jumaitsi judíovi pecujarubinëjavabelia:

–Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi (Mr 12.35-37; Lc 20.41-44)

⁴¹ Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

42 —¿Detsa pacuenia pasivanajamatabëxainaname Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

43 Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsi-
java Cristo yabara, Davidpijinë Espíritu Santo pe-
jamatabëcueneta tajëvelia jumaitsi mapacueniaje:

44 Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jume-
covënëtsiaexanaenatsi abaxë copiaya nijava-
jabitsaë nitorobicuenianexa,” jai Dioso ta-
jatuxanenëjavabelia,

jai bajayata tajëvelia Davidpijinë mapacueniaje
Cristo yabara.

45 Nexata Davidpijinë bajayata Cristo yabara:
“Tajatuxanenë,” itsa jai, nexata Cristo, Davidpi-
jinë apo pemomo. Tsipaji baja cajena saicaya
Cristo Dioso pexënato, nayabarajai Jesús pijacu-
ata fariseovijavabelia fariseovi pecanaëjëtsinexa
Cristo Dioso pexënatocuene.

46 Nexata itsanë ata fariseoviyajuvënënë Jesús
apo jumepitsitsi caejumeyo ata. Bajaraxu-
acujinae fariseovi, saduceovi ata, cujunava
Jesúsjavabelia baja jamatabëcuenejëjëbiaya livaisi
peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi (Mr 12.38-40; Lc 11.37-54; 20.45-47)

¹ Jesús jumaitsi jivi ayabitsaëtojavabelia, pijajivi-javabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peypätaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonaë bajarapacuenia pacatsipaeba, itsanë ata bajarapamonae yajuvënënë apo jamatabënajinae pexanaenexa bajarapacuenia. ⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia piajumanavaitabënexa,

piapiafleco pijanavatabuyalia cēbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanēta. Nexata natsiitapetabiaba penaenexa peyayataevitsi penaenexa petsinubijavanēta. Bajarapamonae itsa najoneyabiaba judíovi penacaetuatabibota, jitsipabiaba penaenexa peyayataevitsi penaenexa petsinubijavanēta. ⁷ Bajarapamonae bitso jitsipabiaba jivi pebajacobinexatsi yayataeya callejava ata. “Patanecujarubinē,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayaibit-saētoxanetojavabelia, pijajivijavabelia ata:

—Pētsa paxamē pajitsipame jivi papecajumaitsinexa paxamējavabelia: “Patanecujarubinē,” papecajainexa. Tsipaji daxita paxamē bepanacaemonaemē Dioso panejume-covēnētsivixae. Xanē, caenēnē Cristonē, athēbēvetsica Dioso taneitorobinētsica jivi tacapanepaenexa, panexainame patacacujarubinēnexa. ⁹ Itsanē itsa pacacujaruba, “Axa,” pajamē pētsa bajaraponējavabelia. Tsipaji caenē paneaxa paxainame, ponē eca athēbētatsia. ¹⁰ Pētsa pajitsipame itsamonae papecajumaitsinexa: “Jivi pevetsinē,” papecajainexa. Tsipaji xanē, caenēnē Cristonē, patacaevetsinē. ¹¹ Ponē paxamēyajuvēnēnē pacavecuayaijamatabēcuenenē, bajaraponē pacayavenonabiaba padaxitamē. ¹² Pajivi

daxitajivi matatoxenetsia pijacuata ayaijamatabëcuenejivi natane, bajarapajivi itsamatacabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayaibitsaëtoxfanetojavabelia, pijajivijavabelia ata.

13 Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi!
 ¡Paxamë judíovi panecujarubivi, pa-
 fariseovimënu, ayaineconi panatsixainame
 Diosojavabelia! Pacuenia bo babaupaxatata
 jivi pejoneyaniva, bajara bepacuenia paxamë
 paexaname. Itsamonae jitsipae ata pejonenexa
 Dioso pijanacuayabetsia, apo pacopatsimë
 pejonenexa saicayalivaisi panecujarubixae.
 Paxamë ata apo pajitsipaemë panejonenexa
 Dioso pijanacuayabetsia.

14 '¡Paxamë saya jivi paneyamaxëitojorobivi!
 ¡Paxamë judíovi panecujarubivi, pa-
 fariseovimënu, ayaineconi panatsixainame
 Diosojavabelia! Yamaxëitojorobiaya pavecu-
 otabiabame pamonajivi pevecuatëpaevanëtsi
 pecobecovëjavaximi. Bajaraxuacujinae pini-
 jicuenia itajara Diosojavabelia pavajëcabiabame.
 Itsiata pepo panexaniajaijamatabëcueneta apo
 pavajëcabiabimë Diosojavabelia. Bajarapacuenia
 pavajëcabiabame saya jivi papecataenexa Dioso
 itajara bitso bepanejumecovënëtsivi. Bajaraxuata

bitso ayaicuenia Dioso pacananeconitsiaex-
anaena pamatacabi Dioso naneconitsiaexanaena
daxita pamonae Dioso apo pejumecovënëtsivi.

15 '¡Paxamë saya jivi paneyamaxëitojorobivi!
¡Paxamë judíovi panecujarubivi, pa-
fariseovimënuu, ayaineconi panatsixainame
Diosojavabelia! Palivaisi pacajinavanapame,
caejivi ata panejumecovënëtsiaexanaenexa,
papecacuenejëpaenexanua, ayaicuenia daxitajava
jivi patsipaebarutame. Nexata pajivi
pacajumecovënëta, bajarapajivi pevajënaeyabelia
bitso naneconitapona Diosojavabelia. Nexata
paxamë panejamatabëcueneta bajarapajivi
paxamë matatoxenetsia bitso Dioso naneconitsi-
aexanaenatsi pexuabinexatsi infiernojavabelia.

16 '¡Paxamë apo payapëtae atamë, Dioso
pejumelivaisi jamatabëcuenenavëxaniabiaya
pacujarubabiabame itsamonae! Nexata
paxamë panecujarubijamatabëcueneta
bajarapamonae pananeconitsiaexaname
Diosojavabelia. ¡Bajaraxuata ayaineconi
panatsixainame Diosojavabelia! Paxamë
jivijavabelia jamatabëcuenenavëxaniabiaya
pajumaitsimë tsabiabi: “Pajivi itsanëjavabelia
najumecapanepaeya jumaitsi pejumexani-
ataenexatsi: ‘Catoexanaenatsi pepacuene.
Cajumaitsi cajena templobo pevënëta,’ jai,
apo itsacuene. Bajarapajivi pejumaitsicovëya
apo exanae ata, itsiata apo naneconitsi
Diosojavabelia,” pajamë tsabiabi. “Pajivi rajane
itsanëjavabelia jumaitsi pejumexaniataenexatsi:
‘Catoexanaenatsi pepacuene. Cajumaitsi
cajena templobopijiorojavanë pevënëta,’ jai,

bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia,” pajamë tsabiabi jivijavabelia. 17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarap- atemplobopijiorojavanë matatoxenetsia. Bajarapaorojavanë ata yaiyatanetsi. Tsipaji bajarapaorojavanë templobopijiorojavanë. 18 Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumeca- panepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi altarpvënëjava pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsitsi altarpvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia,” pajamë tsabiabinua jivijavabelia. 19 Paneamatabocotajavi, bepanei- tatsëcënavanapaevinua panejamatabëëthëtota. Biji rajane beyaiyatanetsi altarpvënëjava, bajarapaaltarpvënëjavajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarpvënëjavajumata boca. 20 Pajivi jumaitsi: “Cajumaitsitsi altarpvënëjava pevënëta,” jai, caecuenia yajavavënëjona bajarapaaltarpvënëjavajumata pebocaeofrenda. 21 Pajivi pijinia najumecapanepaeya jumaitsi

pejumexaniataenexatsi: “Cajumaitsitsi templobo pevenëta,” jai, caecuenia yajavavënëjona bajarapatemplobota peponaponaenë Dioso. ²² Pajivi pijinia najumecapanepaeya jumaitsi pejumexaniataenexatsi: “Cajumaitsitsi athëbëtatsia panacua pevenëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

²³ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënuua, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuenepanetoexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. ²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë

Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamë pananeconitame Diosojavabelia.

²⁵ ¡Paxamë jivi paneyamaxëtojobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijianaejitsipajë Diosojavabelia,” panejamatabëjaitabiabixae, panecaxaevajënae panecaxaenëanë, taza ata, naniavelia paquiatabi-abame xaniavaetsia panijasalinaicuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisi-acuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainaenexa ayaijava ëpaxamënexa.

²⁶ Paxamë pafariseovimë, bepanteaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenexuirajibinexa. Nexata

bajaraxuacujinae pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

²⁷ 'iPaxamë saya jivi paneyamaxëitojorobivi! iPaxamë judíovi panecujarubivi, pafariseovimënuu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajayatsinexa. Bajara pijinia paxamë ata Dioso patsitajamatabëcueneitsimë.

²⁸ Itsamonae naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëitojorobinexa. Itsajava ata pematatsënëa pibisiacuene paneexanaenexa, panajamatabëxainabiabame.

²⁹ 'iPaxamë saya jivi paneyamaxëitojorobivi! iPaxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapaprofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapaprofetavimi. Pamonaemi ata bajayata tëpa, pamonae aneonijibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame

itsacuenejavaxi. ³⁰ Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonaeimi beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. ³² Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetarucaejava isoto, bajara paitsimë. Itsiata apo papanepaemë tsane infiernovecua panijaneconi yabara. ³⁴ Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonae pabeyaxuabaponaename. Itsamonae cruzajavabelia pacobematabiaxuababiabianame. Itsamonae pajumatitibabeyabiabianame penaneconitsivi panejumaconitabiabimacata judíovi penacaetuatabiabibonëjava. Itsamonae

pabaraponabiabianame itsa tomaranëjavabelia
 ata panebejiobiaexanaenexa. ³⁵ Bajarapacuenia
 nexata paxamë ayaineconi panatsixainaename
 Diosojavabelia. Daxita pamonaë aneconijibia
 pejinavanapaevimi Dioso pitabarata, bajayata
 panijasalinaivimi beyaxuababiaba. Nexata
 bajarapaneconimi yajava paxamë pacatsiju-
 majopaena. Dioso pitabarata aneconijibia
 pejinavanapaevimi, panijasalinaivimi
 pebeyaxuabaponaëjava, taxuxuaba Abelpijinëta.
 Bajaraxuacujinaë icatsia pevajënaeyabelia
 beyaxuabapona itsamonae ata, Dioso
 pitabarata aneconijibia pejinavanapaevimi.
 Nexata bexëajavaberena ata Berequíaspjinë
 pexënatomi, Zacaríaspjinë, panijasalinaivi
 beyaxuaba. Zacaríaspjinëmi panijasalinaivimi
 beyaxuaba templobopanabota, templobobeje
 altavënëjavabeje tuatuajëta. ³⁶ Xaniajanë pacue-
 nia pacatsipaebijitsiatsi. Daxita pamonaemi
 Dioso pitabarata aneconijibia pejinavana-
 paevimi, panijasalinaivimi beyaxuababiaba.
 Bajarapaneconimi yajava, paxamë aeconoxae
 panejinavanapaevi, pacatsijumajopaena Dioso
 papecananeconitsiaexanaenexa, jai Jesús judíovi
 pecujarubivijavabelia, fariseovijavabelianua.

*Pacuenia Jesús najamatabëxainaeya sivanua
 Jerusalén tomarapijivi yabara pelivaisi
 (Lc 13.34-35)*

³⁷ Jesús najamatabëxainaeya sivanua Jerusalén
 tomarapijivi. Jumaitsi pesivanuejavata mapacue-
 niaje:

—¡PaJerusalén tomarapijivimë, pabeyabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena!
³⁸ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. ³⁹ Xaniajanë pacuenia pacatsipaebijitsiatsi. Paxamë rabaja apo panetaemë tsane matavëjëa. Matapania itsa panejumecovënëtsianame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënu tsane: “Dioso, bitso yavenonare maponë najetarucaje, nejamatabëcueneta penajetarucaenë,” itsa panesivajamatabëjamë tsane xanë yabara, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamat-acabi itsanacuapijivi templobo pexuabijavanexasica yabara pelivaisi

(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaiejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaeboxanetonë ata, jai.

² Nexata Jesús tajëvelia vajunupaeba itsamatacabi itsanacuapijivi bajarapaboxanetonëmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo bocae tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaejitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana. ⁶ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacua je abaxë apo vereverecajuni tsane. ⁷ Mapanacua je pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitane cuene ata najetarucaena itsanacuanëjava. Ira najëabiana ayaicuenia itsanacuanëjava. ⁸ Daxita bajarapacuene itsa pataename, saya abaxë taxuxuabaponaena piayaicuenia, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje. ⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje: —Nexata paxamë pacacaponaena nacuaevevetsivijavabelia papecabebiobiaexanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë. ¹⁰ Nexata bajarapamatacabita jivi ayaibitsaëto navecuacopabiana tanejumecovënëtsijava.

Namataenetsia naitoya tsane. Namataenetsia nacanajetsiana nacuaevetsivi pecobeyabelia.

¹¹ Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipae-

bivicuenia tsipaebaponaena. Bajarapamonae yamaxëitojorobiana jivi ayaibitsaëtoxaneto. ¹² Jivi

pibisiacuene pexanavanapaevi, pevajënaeyabelia ayaibitsaëtoxaneto tsaponae tsane. Nexata

ayaibitsaëto Dioso pejumecovënëtsivi, namataenetsia penaasivajava vereverecaponaena.

¹³ Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa,

bajarapajivi Dioso capanepaenatsi. ¹⁴ Itsamonae daxita nacuanëjava tsipaebiana jivi peyapëtaenexa

imoxoyo baja pevajënae Dioso pijajivi pecapanepaejavanexa. Bajaraxuacujinae jane

baja mapanacua vereverecaenaje, jai Jesús pijajivijavabelia tajëvelia pevajunupaebijavata

pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajëvelia vajunupaeba papi-ayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

–Diosojumepaebinëmi profeta Danielpijinë piayaicuene tajëvelia pevajunupaebilivaisi

bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi

yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.)

Nexata paxamë itsa pataename bajarapapi-ayaicuene penucaejava templobota, nexata

Judea nacuata pejinavanapaevi pëtsa nubena.

Naxanitsiayo rēcēpecaena petsutonējavabelia.
¹⁷ Pajivi pijabojumata athēbēyo ecaya, itsa vēnēlivaisitaena bajarapapiayaicuene penucaejava templobota, bajarapajivi perunaecujinaetsica, bepījia najetabajiraviana. Pētsa joneya pijaboyalia pejutsinexa pecobecovē. ¹⁸ Pajivi pijinia nacuenebaponapona pijapabita, itsa vēnēlivaisitaena bajarapapiayaicuene penucaejava templobota, bepījia najetabajiraviana. Pētsa naviata pijaboyabelia pejutsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejibitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajēvelia Dioso javabelia pavajēcare piayapēbejematacabita papecatocopiapatsiyaniva bajarapapiayaicuene. Nexata pamatacabi parēcēpecaename, pexaniamatacabi Dioso pacatocopatsiana bitso nabejibitsiaya paneponaeyaniva. Pavajēcarenu penacueraevetsimatacabita bajarapapiayaicuene papecatocopiapatsiyaniva, nexata papecatoayapēbejeyaniva. ²¹ Tsipaji raja bajarapamatacabi bitso jivi bejiobi tsane. Pabejibicuene abaxē jivi caeto ata apo tae Dioso nacua pexanaecujinae, bajarapabejibicuene taena. Bajaraxuacujinae icatsia itsamonae bejibiaexanae atatsi tsane, itsiata bajarapacuenia bitso apo bejibiaexanaetsi tsane. ²² Dioso epatua yatuucutsiana jivi bitso nabejibitsiaya pejinavanapamatacabianēminexa bitso jivi nabejibitsia pejinavanapaeyaniva. Dioso epatua

itsa apo yatuucutsi tsipae bitso jivi nabejio-bitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejio-bitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame.

²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepapacuenë Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

²⁵ Tajëvelia rabaja maje pacatsipaebatsije.

²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje.

Naxanitsia. Panataename,” itsa pacajai tsane, pëtsa pajumecovënètame. ²⁷ Payapëtaneme rabaja mapacueneye. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁸ Payapëtaneme rabaja mapacueneye ataje. Quequeremonae bepìjia bayapëtaneme itsajota petuxutsaebinë boca. Nexata bajarajota bepìjia banacaetuana. Bajara pijinia pacuenia daxitanacuanëpijivi tajajivi bepìjia yapëtaena tapatsijavatsica. Nexata bepìjia nacaetuanaena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara peliv-aisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pija-jivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejobitsiaya jinavanapaena. Nexata jivi nabejobitsiaya pejinavanapaematacabicujinae, matacabipi-jijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane.

³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë.

Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenivenaecotia yajavapatsianicajë.³¹ Bajaraxuacujinae trompeta itsa najumetsiana ayaijumeta, itorobianajë tajaánglevi. Angelevi daxitanacuanëjavaverena xanëjavaberena netocaetuatsiana tajajivi, pamonaë Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa.³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica.³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonaë jane baja vereverecaena.³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata

jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamat-
acabi icatsia pepatsijavanexatsica. Jesús jumaitsi
pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, pat-
sianicajë. ³⁸ Pamatacabi Noépijinë ponapona
ira pebubutsivajënaeya, jivi picani xaniavaetsia
jamatejema pexaejava xaevanapa. Apaevana-
panua. Nacojobapona itsamonae. Itsamonae
pexënatoyonë pebijavabelia canajetapona petona-
cojobinexatsi. Bajarapamonae jamatejema saya
jinavanapa. Nexata bajarapamatacabi Noépijinë
ëpijamonae pinijibarcoxanetojavabelia barëjunua.

³⁹ Daxitajivi abaxë itsiata apo yapëtae paepa-
tota tocopiapatsijitsiatsi peyabubutsijavanexatsi.
Nexata itsajivi ata yapëtaenejeva jemata ayaiemax-
aneto itsa jopa ira pebubutsinexa, yapëtane jane

baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najuacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

⁴² Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. ⁴³ Pacanaëjère mapacueneje. Bo pexainaenë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. ⁴⁴ Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba

petuxanenë pijajivitonëbeje pelivaisicuenia yabara pelivaisi

(Lc 12.41-48)

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarpacuenia pijajivijavabelia tsipaeba copiaevetsi-aya petonacuenebavanapaenexatsi icatsia pepat-simatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta tovetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoebetaponaponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. ⁴⁸ Itsa bajaraponë piagamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucæ tsane bajayajebi,” jamatabëjai tsipae. ⁴⁹ Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piatajibivita. ⁵⁰ Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë.

51 Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bajarapacuenie yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa,

bajarapapejanavi penaponaenexa bajara-
 pajivibeje pepëta penacasabifiestajavabelia.
 2-4 Bajarapamonaeyajuvënëvi, cinco povabeje,
 yapëtae ata picani petsicaponaejavanexa
 aceiteranë pijalámparabëxinexa, itsiata apo
 tsicaponae itsa tovereverecatsi aceitera
 peepatsinexa icatsia pijalámparabëxijavabelia.
 Cinco pijinia povabeje peyapëtaexae petsicapon-
 aejavanexa aceiteranë pijalámparabëxinexa,
 tsicapona. 5 Nexata bajarapapetiriavi
 itayotena pijalámparabëxita. Bajayajebi
 picani vajënaeevetena penacasabinënexa
 pepatsijava. Nexata pijalámparabëxita
 paaceiteranë capona, tovereverecaponatsi
 baja. Tsipaji penacasabinënexa abaxë
 cuenenajemata pepatsinexa. Nexata baja daxita
 bajarapapetiriavi belia itamajitsipana. Nexata
 baja majita. 6 Bajaraxuacujinae ayaimeravi
 tuatuajëta jumetane pevavajajava. “¡Najetaruca
 rajane baja penacasabinënexa! ¡Papitsaparemena
 jane baja panecopiapitsinexa!” pejajava
 jumetane. 7 Nexata daxita bajarapapetiriavi
 nonobapuna pecopiapitsinexa jane baja.
 Papetiriavi aceiteranë tsicapona, epaca
 pijalámparabëxijavabelia. Caeva canacujitsia
 pijalámparabëxi ayaicotia exana. 8 Nexata
 papetiriavi apo tsicaponae aceiteranë, jumaitsi
 aceiteranë petsicaponaevijavabelia mapacue-
 niaje: “Panenarajure tsiquirijavaxi aceiteraxi.
 Tsipaji patajalámparabëxi panetoitacaëcaënazona,”
 jai bajarapamona. 9 Itsiata aceiteranë
 petsicaponaevi jumaitsi: “Jume. Apo caëjëpae.
 Paxanë ata meta apo panetocaëjëpae tsipae.

Paponaremelia. Panijacuata pacomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa. ¹⁰ Nexata papetiriavi aceiteranë apo tsicaponae pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicapona pijalámparabëxinexa, napona baja penacasabifiestanexa pexanaebojavabelia. Pejonecujinaelia baupaxatata. ¹¹ Bajaraxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubenae bojumavelia. ¹² Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavana-paename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenë pelivaisicuenia yabara pelivaisi

(Lc 19.11-27)

¹⁴ Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonaë tajajivi, panetonacuenebianame. Nexata pamatacabi icatsia patsianicajë, pacuenia pacasivanajamatabëxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë itsa ponaejitsia tajënacuyabelia, junata pijajivi. Evetsiaexana pijapalata petoevetsinexatsi pecovëta.

¹⁵ Caenë canacujitsia evetsiaexanapona peto-canacuenebinexatsi pecovëta pacuenia bajarapamonaë caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyabelia.

¹⁶ Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacincó mil ponëbeje. Nexata baja daxitata diez mil ponëbeje caejavata. ¹⁷ Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. ¹⁸ Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

¹⁹ Bexëa nexata najetaruca petuxanenë. Junata pijajivi peyapëtaenexa pacuenia toevetatsi pecovëta pijapalata. ²⁰ Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë

pijatuxanenējavabelia: “Nevetsiaexaname cinco mil ponēbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacinco mil ponēbeje, xua nacanabajē bajarapapalatata,” jai bajaraponē pijatuxanenējavabelia. ²¹ Nexata petuxanenē jumaitsi: “Xanepana rabaja. Xaniavaetsia netoebetaponaponame. Itsajamatabēcuene apo najamatabēxainaemē. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsēnēa ayaijaya. Jonemena xanējavaberena barēyaya neponaponaenexa xanējavata,” jai petuxanenē pijajivitonējavabelia. ²² Bajaraxuacujinae pata ponē dos mil ponēbeje evetsiaexanatsi. Nexata bajaraponē jumaitsi pijatuxanenējavabelia: “Nevetsiaexaname dos mil ponēbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponēbeje, xua nacanabajē bajarapapalatata,” jai bajaraponē pijatuxanenējavabelia. ²³ Nexata petuxanenē jumaitsi: “Xanepana rabaja. Xaniavaetsia netoebetaponaponame. Itsajamatabēcuene apo najamatabēxainaemē. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsēnēa ayaijaya. Jonemena xanējavaberena barēyaya neponaponaenexa xanējavata,” jai petuxanenē pijajivitonējavabelia. ²⁴ Icatsia pata ponē evetsiaexana mil ponēbeje. Bajaraponē jumaitsi pijatuxanenējavabelia: “Cacueneyapētanetsi. Xamē nijajivi apo itaxutobejiobiataeyabiabimē. Xamē nijajivi

ubiaexanabiabame neubiaexanabiabijava
 nexata bajarapamonae pejamatabēcueneta
 ayaijava palata pecatopitsapaenexa. Bajara
 pijinia pacuenia xanè ata nevecuapitsipame xua
 nacanabijitsipajë nijapalatata itsa canacuenebi-
 jitsipajë. ²⁵ Bajaraxuata junavajë. Ponajë
 irata tamatayatsiamëthëtetsinexa nijapalata.
 Bajara manijapalata catocanaviatatsije,” jai
 bajaraponë pijatuxanenëjavabelia. ²⁶ Nexata
 petuxanenë jumaitsi: “Tajajivitonë atamë,
 itsiata ajamatabēcuenebejemë. Afaetabimënu.
 Xamë baja cajena yapëtaneme tajajivi taubi-
 aexanabiabijava, taubiaexanabiabijava nexata
 bajarapamonae pejamatabēcueneta ayaijava
 palata tanetopitsapaenexa. ²⁷ Bajaraxuata
 xanepanaejitsipa itsa netocanacuenebiaexanae-
 jitsipame tajapalata banco pevetsivijavabelia.
 Nexata aeconoxae banco pevetsivi tajapalata
 pecacovaetsijamatabēcuenë netocanaviatsipa
 tajapalata pematatsënëa,” jai petuxanenë
 pijajivitonëjavabelia.

²⁸ Nexata petuxanenë jumaitsi bajarajota
 penubenaevijavabelia: “Pavecuapire
 bajarapamil ponëbeje. Nexata juya parajure
 ponëjavabelia xaina diez mil ponëbeje. Tsipaji
 bajaraponë caëjëpatsi tanetoevetsinexa
 pematatsënëa. ²⁹ Tsipaji pajivi ayaijava
 baja xaina, pematatsënëa icatsia itsajava
 rajutsianatsi. Nexata xainaena ayaijava.
 Itsiata pajivi tsiquirijavayo xaina, bajarapajivi
 pijatsiquirijavayomi vecuapitsianatsi. ³⁰ Maponë
 tajajivitonëje, itsacuenejavayonexa ata,
 apo netoxanepanae. Paxuabaremelia

pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaitsi pamonaex pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara pelivaisi

³¹ Jesús tajëvelia navajunupaeba pacuenia it-samatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacua taevetsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata. ³²⁻³³ Nexata daxitanacuanëpijivi caetuatsianatsi taitabarata. Tsataponaenajë bajarapamonaex. Oveja pevetsinë ovejavecua chivo saicaya tsatapona. Nexata oveja pevetsinë petsavenononia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenononia nubenaeyaexanaenajë. Dioso pijinia pejumecovënëtsivi tacujuanenia nubenaeyaexanaenajë. ³⁴ Nexata jumaitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutotsoniataevi. Payajavajinavanapaename taxa

pijanacuatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujuanenia penubenaevijavabelia. ³⁷ Nexata bajarapamonae nejumai tsane: “Tajatuxanenë, ¿detsa pacujinae niajanijavata patajucarajutsi nexaejava?” nejai tsane. ¿Detsa pacujinae mera nejitsipaejavata patajucarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinë patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajucarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë

tsane.

41 'Nexata tatsavenonemia penubenaevi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo peverevereceaesotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. 42 Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. 43 Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonemia penubenaevijavabelia. 44 Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae nijanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota

pecaetsijavata, apo paponanē patacataenexa?” nejai tsane bajarapamonae. ⁴⁵ Nexata xanē jumaitsinē tsane bajarapamonaejavabelia: “Xaniajanē pacuenia pacatsipaebijitsiatsi. Bajarapacuenia itsa apo patoexanaemē paneyavenonaenexa tajajiviyajuvēnējivijavabelia, nexata bajaraxua xanē taniiji xanējavaberena apo patanetoexanaejavamē,” janē tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamonae ponaena penaneconitsiajinavanapaenexa daxitamatacabijavabelianexa. Pamonae Dioso pejume-covēnētsivi, bajarapamonae Dioso rajutsianatsi matacabi apo peverevereceajava, jai Jesús pijajivijavabelia tajēvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

26

*Pacuenia picani Jesús pijavajabitsaē
jamatabēvaetabatsi yabara pelivaisi
(Mr 14.1-2; Lc 22.1-2; Jn 11.45-53)*

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajēvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

² —Payapētaneme rabaja anijamatacabibeje pesajinaejava pejonenexa baja pascuavēnēfiesta. Nexata xanē, Daxitajivi Pematapijinēnē, necanajetsiana itsamonae pecobeyabelia

tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinua. Nacaetuata judíovi pijaancianovinua. Daxita bajarapamonae nacaetuata Caifásvënënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënëtsilivaisita picani Jesús jamatabëvaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitsacueniabiyanima, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi
(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatacabi raja bepejiobivi jinavanapa itsaxuayo pajinavana-pame. Itsiata baitsi jane xanë daxitamatacabi apo ponaponaenë tsane paxamëjavata. ¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabit-saë pecobeyabelia pecanajetsinexa yabara pelivaisi (Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona

sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi.
¹⁵ Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponae najë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainanëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana

patacabarëxaenexa xua jivi baxane pascua fiestamatacabi,' jai raja vajanacacujarubinë," pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

²⁰ Nexata baja ajena meraviyotsia, Jesús pijajivi, doce ponëbeje, barëeca mesa muxuneneta.

²¹ Nexata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaitsi pijajivijavabelia:

—Ponëbeje peneta caecuenia panajuacajabut-sianajëbeje panbë platojavabelia, bajaraponë necanajetsiana tajavajabitsaë pecobeyabelia.

²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae.

Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

²⁶ Pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. ²⁸ Tsipaji tajana othopaena jivi ayaibitsaëtoxaneto pibisiacuene pexanaeneconi pevecuaajibiaexanaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane

uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename taja-jivitonëcuenemë,” jai yabara pelivaisi

(Mr 14.26-31; Lc 22.31-34; Jn 13.36-38)

³⁰ Jesús pijajivi barëanaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara pe-fiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsi-ata cajena apo nayavajunuaxainaenë tsane nija-jivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia
Getsemanívënëjavata yabara pelivaisi*

(Mr 14.32-42; Lc 22.39-46)

³⁶ Jesús pijajivi pecunuameravita yajavapata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainajava, jamatabëyatëpajë. Paxamë abaxë majotaje

panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejibicueenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caeepatoyo ata paneaitavatsenaenexa? ⁴¹ Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajobicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. ⁴⁴ Nexata abaxë bajarapamonae pemajitanubenaevavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴⁶ Panonobapunare baja. Ponaenatsi baja. Imoxoyo rabaja najetaruca tavavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi

(Mr 14.43-50; Lc 22.47-53; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuaijai tsanucacae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëttoxaneto. Bajaramonaeyajuvënëvi itsamonae canajetarubena espadanë. Itsamonae canajetarubena naebonë

yajava. Bajarapamonae itorobatsi sacerdotevi penamatacaitorobivi, judíovi pijaancianovinua.
⁴⁸ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsut-sunexuabianajë, bajaraponë Jesús tsane. Bajara-ponë pavaetabianame. Pacobecëtsiana xaniavaet-sia, jai baja cajena Judas pematacanajetarucaevi-javabelia pebarërenavajënae.

⁴⁹ Nexata jane baja Judas itsa patanajetaruca, exana pacuenia jumaitsi pematacanajetarucaevi-javabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesúscuene. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cu-jibarëcëpaliatsi. Vaetabatsi. Cobecëtatsi xaniavaet-sia pecaponaenexatsi.

⁵¹ Bajarajota Jesús pijajiviyajuvënënë pijaes-pada navemarajonotaxuabina. Muxuyoropaebi-axuaba sacerdotevi pepo penamatacaitorobinë pijajivitonë. ⁵² Nexata Jesús jumaitsi pijajivi-tonëjavabelia:

—Nijaespada baja xataremeca pevënojojavareca. Tsipaji pamonaе namaxëvanita espadata, daxita bajarapamonae juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso

ayaibitsaëtoxanetonë ángelevi. ⁵⁴ Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. ⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë.

Nexata Caifás pijabota nacaetuana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

⁵⁹ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

61 Jumaitsibeje bajaraponëbeje Jesús yabara:

—Maponë jumaitsije: “Xanë necaējēpa taxuabinexatsica Dioso pijatemplobo. Necaējēpanua acueyabi matacabita icatsia taveretetsinexa itsabo,” jai maponëje, jaibeje bajaraponëbeje Jesús yabara.

62 Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapētaemē tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

63 Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinxamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

64 Nexata Jesús jumaitsi:

—Jājā, xanë rabaja pacuenia nejumaitsimë. Nexata icatsia pacajumaitsitsi. Paxamë raja panetaename xanë, Daxitajivi Pematapijinënë, taecaejava Dioso pecujianenia, daxitajamatabëcuene pecaējēpaenëtsi. Panetaenamenua tanajetaruaejava athëbëvetsica itarërëbota, jai Jesús.

65 Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae

Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Mara ponē Dioso apo pejitsipaecuenia cuaicuajaije. Dioso bepexēnato nataeya cuaicuajai. Pijacuata rabaja naneconita bajarapacuenia pecuaicuajiaxae. Pematatsēnēa baja apo namatavenonaetsi itsamonae vajanacatsipaebinema paneconi yabara maponēje naneconitsiaexanaejitsiatsi. Paxamē rabaja pajumetaneme maponēje Dioso apo pejitsipaecuenia pecuaicuajaijava. ⁶⁶ ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷Nexata bajarapamonae Jesús itabarasuabatsi. Bajaraxuacujinae papaëbërēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Itsamonae itabarapacabiauxu-ababiabatsi. ⁶⁸Nexata bajarapamonae jumai tsaponae Jesúsjavabelia:

—¡Xamē raja itsa Cristomē, athëbëvetsica Dioso itsa pecaitorobinētsica jivi necapanepaenexa, nexata vënëjonare ponē caitabarapacabiauxuaba! jai tsaponae bajarapamonae.

Pacuenia Pedro nayavajunuaxaina Jesús pija-jivitonēcuene yabara pelivaisi

(Mr 14.66-72; Lc 22.56-62; Jn 18.15-18, 25-27)

⁶⁹ Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaiti Pedrojavabelia:

—Xamë ata rabaja naponaponame Jesústa, Galilea nacuapijinëta, jai.

⁷⁰ Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaiti:

—Xanë cajena apo yapëtaenë pacuene yabara nejumaitsimë, jai.

⁷¹ Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaiti bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

⁷² Nexata icatsia Pedro nayavajunuaxaina Jesús pijajivitonëcuene. Pedro jumaiti:

—Xaniajanë. Dioso pitabarata cajumaiti. Apo yapëtaenë cajena bajaraponë, jai.

⁷³ Bajaraxuacujinae icatsia, caepatoyocujinae, bajarajota penubenaevi kujibarëcëpaliatsi Pedro. Jumaiti bajarapamonae:

—Xaniajai raeta baja cajena. Xamë Jesús pija-jiviyajuvënënëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaname tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejajava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi

(Mr 15.1; Lc 23.1-2; Jn 18.28-32)

¹ Ajena baja matacabi tsarucaponae, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi.

² Nexata Jesús cobecëtsiaya caponaliatsi nacuaevetsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë ita tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. ⁴ Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

7 Nexata bajarapamonae najamatabëjëpa bajarapapalatanëanëta pecomuatsinexa ira. Nexata bajarapamonae bajarapapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa.

8 Bajaraxuata mapamatacabijavaberena ataje vënëruba bajarapaira mapejumaitsivënëje: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaivënë vënëruba.

9 Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremíaspijinë bajayata tajëvelia vajunupaeba bajarapapalata. Profeta Jeremíaspijinë baja cajena bajarapapalata yabara tajëvelia jumaitsi mapacueniaje: “Israelnacza pevetsivi rajutsiana jivitonë pecanajetsinëjavabelia treinta ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana.

10 Nexata bajarapapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspijinë tajëvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi

(Mr 15.2-5; Lc 23.3-5; Jn 18.33-38)

11 Jesús nutatsi nacuaeavetsinë Pilato pitabarata. Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai Pilato.
Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxu-abinexatsi yabara pelivaisi
(Mr 15.6-20; Lc 23.13-25; Jn 18.38-19.16)

¹⁵ Nacuaeavetsinë Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabi-abibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ¹⁶ Pamatacabi Jesús

naneconitsiaexanatsi, bajarapamatacabi penaneconitsivi pejebabiabibota naneconitsi-aponapona jivibenë, Barrabásvënënë. Bajaraponë bitso piacujirubejenëcuene yapëtanetsi daxitajivi. ¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponë pajitsipame patacatocapit-sapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

¹⁹ Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponë, ponë itsacueneneconiyo ata apo penaneconitsinë. Ajena raja, meravi, amajitsinaebejenë bajaraponë yabara,” jaitsirena Pilato pijava. Nexata picani Pilato jamatabëcopata Jesús.

²⁰ Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinexatsi, jai tsaponae bajarapamonae.

²¹ Nexata nacuaevetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapit-sapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

22 Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

23 Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiaata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

24 Pilato tane piajumesaëjava bajarapamonae. Muxujiobi ata, apo jumecovënëtsitsi. Bitsoyo biji caranata bajarapamonae jamatabënaeacajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapëtaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatabëcueneta apo beyaxuabi-aexanaenë tsane maponëje, planeconijibinë. Paxamë panejamatabëcueneta pabeyaxuabiaexanaename, jai Pilato.

25 Nexata daxita bajarapamonae jumaitsi:

—¡Itsa bajaraponë planeconijibinë Diosojavabelia, nexata bajaraponë patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

26 Nexata baja Pilato tocopata Barrabás pepitsapaenexa penaneconitsivi pejebabihibovecua. Itorobanua vajabitsaëvi ayaicuenia Jesús pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

27 Nexata baja Pilato pijajivi, vajabitsaëvi, Jesús caponaliatsi nacuaevetsinë Pilato pijaboxanetovabelia. Nexata bajarajota Jesús matatoyorotsia nacaetuatatsi daxita vajabitsaëvi. 28 Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava benacuaevetsinëcuenia petaenexatsi. 29 Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsiheberutatsinua naebo pecujuanenia benacuaevetsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponaetsi:

—¡Bajaco, judíovi pepo pevetsinë! jai tsaponaetsi bajarapamonae.

30 Suabaponatsi. Vecuapitatsi naebo. Bajarapanaebota mataconitajarababiabatsi.

31 Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mr 15.21-32; Lc 23.26-43; Jn 19.17-27)

32 Vajabitsaëvi Jesús itsa caponaliatsi tomaravecua, namutota caxitajaraba Simónvënënë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

33 Jesús caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejaijume. 34 Bajarajota picani Jesús rajutatsi vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

35 Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë itsa natsicobetsana

Jesús penaxatatsijavami, tocopiapatatsi jane baja pacuenia Diosojumepaebinēmi profetanē bajayata tajēvelia vajunupaeba Jesús penaxatatsijava. Jesús penaxatatsijava yabara, profetanēmi bajayata tajēvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapētaenexa ponē pitaponaejitsia,” jai profetanēmi. ³⁶ Bajaraxuacujinae vajabitsaēvi bajarajota evetena penaitaxutocaevetsinexatsi Jesús. ³⁷ Bajarajota Jesús pematabocoto matatsēnēyo cruzajavata, yaquinaruta tablapayota itsamonae ata peyapētaenexa pajamatabēcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponē Jesúsje, judíovi pepo pevetsinē,” jai tsarutsi Jesús yabara.

³⁸ Anijanēbeje penacobetoxotsinēbeje Jesús yajavacobematabiabarutatsi. Caenē canacujitsia pijacruzata rubatsi. Bajaraponēbeje Jesús pemuxuneneta rutatsibeje. Itsanē Jesús pecujanenia rutatsi. Itsanē Jesús petsavenonenia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. ⁴⁰ Jumai tsabiabi bajarapamonae:

—Xamē raja imata jumaitsimē: “Xuabianicajē templo. Acueyabi matabita icatsia veretetsianajē itsabo,” jamē. Nacapanepare jane baja nijacuata. Itsa xaniajai Dioso pexēnatomē, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ępamonae najumaitsi:

⁴² —Maponėje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa apo caējēpaetsi. Itsa xaniajai Israel nacuapijivi pepo pevetsinē, nexata aeconoxae cruzajavavetsica runaenica vajataenexa. Nexata jane baja jumecovēnētsianatsi Cristonēcuene. ⁴³ Bajaraponē pina najamatabēcuenecopata Diosojavabelia peyavenonaenexatsi. “Xanē raja Dioso pexēnatonē,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponēbeje penacobetoxotsinēbeje Jesús yajavacobematabiabarutatsi, bajaraponēbeje ata Jesús bijataerucatsibeje bajarapacuenia.

*Pacuenia baja Jesús tēpa yabara pelivaisi
(Mr 15.33-41; Lc 23.44-49; Jn 19.28-30)*

⁴⁵ Jesús baja itsa tēpaejitsia, ajena matonejejit-sia, daxita nacuanējjava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aējai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsiyume: “TajaDioso,

tajaDioso, ¿detsa xuajitsia baja tajaepato necopatame?” pejaijume.

⁴⁷ Nexata itsamonae bajarajota penubenaevi bijiaya jumetane bajarapacuenia Jesús pejumait-sijava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Diosojumepaebinëmi, jai bajarapamonae.

⁴⁸ Nexata bajarapamonaeyajuvënënë bepijia cujinaelia pecarenanexa esponjavënëjava. Nexata esponjavënëjava jabutaba piajatuvinorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocaponaeya.

⁵⁰ Icatsia Jesús pinijicuenia aëjai. Bajaraxuacujinae jane baja Jesús tēpanajereca.

⁵¹ Paepatota Jesús tēpanajereca, bajarapaepatota templobo ënëtuatuajëalia peyatuucutarutsipana, ayaipapaëbërëpanaxaneto, titititica tuatuajëareca, athëbëvetsicacujinae irabereca. Ira najëaba. Ibotoxanetonë ata sarapajunujunua.

⁵²⁻⁵³ Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi matabacabita icatsia itsa asaë petëpaecujinae, pamonae pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

⁵⁴ Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexta bajarapamonae itsa tane ira penajëabijava, itsajavanë ata itsa taepona, bajarapamonae bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonae.

⁵⁵ Bajara jota petiriavibitsaëtoxaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaverena, Jesús peyavenonaevimitsi. ⁵⁶ Bajara papetiriavibitsaëtoxaneto tuatuajëta nanubena mapamatabëxëyoje. Itsava Mariávënëva, Magdala tomarapijiva. Itsava icatsia Mariávënëva. Bajara pova Santiagobeje Josébeje pena. Itsava pijinia Salomévenëva. Bajarapova pijinia Santiagobeje Juanbeje pena. Bajarapova Salomévenëva, Zebedeo pijava.

Pacuenia Jesús petëpaenë mëthëtatsi yabara pelivaisi

(Mr 15.42-47; Lc 23.50-56; Jn 19.38-42)

⁵⁷ Itsa baja caniviyotsia, José, Arimatea tomara pijinë, pona nacuaevecsine Pilatojavabelia. Bajaraponë José bitso pexainaenë pexinaejava. José jumecovënëtaponapona Jesús Cristocuene.

⁵⁸ Nexata José itsa pata nacuaevecsine Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. ⁵⁹ Nexata José cruzajavavetsica pitsica Jesús petëpaenë. Mataquionaeya daxitanëreca matakacëba

pexaniaviria piapiasábanapanata, piaxuirajibi-panata. ⁶⁰ Bajaraponë José, pamatacabi tēpa pemēthētsinexatsi picani, iboitapajanitojavata pinijiibovaju toexanabuatatsi cajena. Nexata bajarapaibovajulia José buata Jesús petēpaenē. Nexata bajaraxuacujinae pinijiibopanaxaneto José tixirena. Yavajuvēpaacatabuata. Nexata baja José naviata pijaboyabelia. ⁶¹ Bajarajota ibovaju itapajavata eecabeje anijavabeje ēMaríavēnēvabeje. Itsava María, Magdala tomarapijiva.

*Pacuenia vajabitsaēvi Jesús pemēthē
evetavanapa yabara pelivaisi*

⁶² Pascuafiesta pejonematacabinexa pevajēnaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatacabi abaxē bajaraponē asaē tsaponaponae bitso najumetsēnētabiaba. Jumai tsabiabi: “Tatēpaecujinae, acueyabi matabita, icatsia asaēnē tsane,” jai tsabiabi. Bajarapejumaitsijava paxanē apo panacofēnētsinē. ⁶⁴ Nexata nijajivi itorobare bajaraponē pemēthē xaniavaetsia pevetsinexa. Nexata nijajivi bajaraponē pemēthē xaniavaetsia evetsiana acueyabi matabijavabelia, bajaraponē pecapaebimatabijavabelia.

Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejajjava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaevi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

28

Pacuenia Jesús petëpaecujinae icatsia asaëyabara pelivaisi

(Mr 16.1-8; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, meravia pitsijavata, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje

Jesús pebuatsiibovajutsijavabelia. ² Jemata ira najëaba. Tsipaji Dioso pijaängel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. ⁴ Vajabitsaë, pamonaevetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitsi petirivabejjavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucae majotaje. Asaë rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani buatatsi. ⁷ Bajaraxuacujinae paliamëbeje tsane bepíjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinexabeje, jai ángel bajarapovabejjavabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinexabeje Jesús pijajivijav-

abelia. ⁹ Bजारापovabeje namutualia pecujinaejinaenajetarucaejavatabeje, Jesús jemata tsi-tanaitajētatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematabacabēta nucajunuabeje. Sitaicaliabeje yaiyataeya Jesús pecopiapitsinexabeje bajarapacuenia. ¹⁰ Jesús nexata jumaitsi bajarapovabejejavabelia:

—Pētsa pajunavamebeje. Paliāmērebeje tajajivijavabelia. Pajumaitsimēbeje tsane tajajivijavabelia: “Jesús raja jumaitsi. Paponeremelia pina Galilea nacuyabelia. Baja pina jotalia pacacaxitarabiana Jesús,” pajamēbeje tsane tajajivijavabelia, jai Jesús.

Pacuenia vajabitsaēvi navajunupaeba yabara pelivaisi

¹¹ Paepatota ēMaríavēnevabeje naviatabeje Jesús pebuatsiibovajutsijavavelia, vajabitsaēvi, Jesús pemēthē pevetsiviyajuvēnēvi, pona tomarabelia. Bजारापामonae tsipaeba sacerdotevi penamatacaitorobivijavabelia pacuenia tane bajarapamonae. ¹² Nexata sacerdotevi penamatacaitorobivi pona judíovi pijaancianovijavabelia penabarēcuaicuajainexa penajamatabējēpaenexa pacuenia exanaejitsia.

Nexata jane baja bajarapamonae najamatabēcuenejēpa. Nexata bajarapamonae rajuta ayaijava palata vajabitsaēvijavabelia.

¹³ Bजारापामonae jumaitsi vajabitsaēvijavabelia:

—Jivijavabelia pajumaitsimē tsane: “Meravi pataitamajitsita, Jesús pijajivi pata. Nexata bajarapamonae juta Jesús petēpaenē,”

pajamē tsane. ¹⁴ Nexata nacuaevetsinē Pilato itsa jumetaena mapajumeje, paxanē itsiata pacayavenonaenatsi itsacuene papecaexanaeyaniva, jai bajarapamonae vajabitsaëvijavabelia.

¹⁵ Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenē jutatsi, jai tsaponae jivijavabelia.

Bजारapacuenia vajabitsaëvi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenē jutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi

(Mr 16.14-18; Lc 24.36-49; Jn 20.19-23)

¹⁶ Jesús pijajivi once ponëbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapabatsi. ¹⁷ Nexata bajarapatsutojumata Jesús pijajivi itsa taenuta Jesús, yaiyataeya pitabarata pe-matabacabëta tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesús meta, jamatabëjai.

¹⁸ Nexata Jesús pijajivi cujirena. Jumaitsi pija-
jivijavabelia:

—Dioso baja cajena nevetsiaexana daxitacuene
athëbëtatsia, daxita mapanacuajava ataje,
taevetsinexa.

¹⁹ Nexata pacaitorobatsi.
Paponare daxitanacuanëjava daxitanacuanëpijivi
tajumelivaisi patanetotsipaebinexamë
tanejumecovënëtsinexa.

Bजारपामोनाए पाबुतिसाबोनाएनामे ताखा पेवेनेता, खाने आ
पेखेनातने तवेनेता, एस्पिरितु सान्तो आ पेवेनेता.

²⁰ Bजारपामोनाए पासिपाेबोनाएनामे
पेजुमेकोवेनेतवानापानेखा दाखिता पाकुनिया
पासिपाेबोनाएनामे पेसा पानाकोफेनेतामे

दाखितामाताकाबि पाताकायाजावोनापोनाएजावा.
नाकुआ पेवेरेवेरेकाएजावोबेलानेखा आ पाकाया-
जावोनापोनाएनासि, जाइ जेसूस पिजाजिविजावोबेलिया.

**Dios pejumelivaisibaxuto
pejanalivaisibaxuto
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022

bc03f416-faf8-5000-bfb5-5ca8a3fa98cf